

## **Kiglerpotunanu Tokanchi Kpashiri Gwa Yonatanru**

### *Tokanchi*

<sup>1</sup> Yinuwakikolu wane rawa Tokanchi. Ga wa Tokanchi Goyakaluymananru. Ga wa Tokanchinwa Goyakalu. <sup>2</sup> Yinuwakikolu Tyenwa Goyakaluyma.

<sup>3</sup> Ptowrunanuka kamrutka Waleya. Wale mwaknu gikenna kamrutka wa gwachritka. <sup>4</sup> Wale rawa giweklu. Ga wa giweklunwa yine pokamlatyegitachri. <sup>5</sup> Pokamlalu mapshagawaka pokamlatachri. Wa mapshagawaka gi gakagloklu.

### *Gwa gipgujtatlu pokamlalu*

<sup>6</sup> Waneru satu jeji Goyakalu yokanatanru. Gwa giwakatletachri. <sup>7</sup> Wale gina rupgujtawatinripa, rupgujtatyaplu pokamlalu, ralixinripna pejnuruneko wale chinanu. <sup>8</sup> Gi wa pokamlalni wale, seyni runa rupgujtatyaplu pokamlalu.

### *Pokamlalu galikakpotunanu*

<sup>9</sup> Tokanchinwa pokamlalu galikakpotunanu. Wa pejnuruko yineru pokamlatachri tye psolchijneko gapokachri. <sup>10</sup> Tyechijne rawanata. Tye psolchijneko kamrutka Waleya. Tyechijne gajene gi gimatlu. <sup>11</sup> Walenu runyegita Wale. Ga wa Walenune gi wa yoptotluna. <sup>12</sup> Seyni pejnuruneko yoptotjene Wale gitakna Goyakalu wgenene rixinripna, wa ralixgiwakatjene.

13 Wanna gi wa granchiko wugenetikna, gi wa manchi galukyawaka, gi wa jeji galukyawakako, seyni Goyakaluya wugenetikna.

*Tokanchiko manewata*

14 Tokanchiko manewata. Wixatskala rawanat-apa. Wetlu royaknu. Girchi satupjerutu Gituru goyaknu waneylu. K gimutlewaklerpotni. Galikakpotni.

15 Gwa gipgujtatlu. Wane china sapleta, “Tyenwa nchinjenatanru, ‘Najxigi ginachripa, muchichachri gitaya, gi rixanu muchinanu gwachrini gitaya.’ ” 16 Gi rixanu wane rixle gixoluruya wyoptojeta pejnurunekwu. Ga wa rumutlewle wanepnute rumutlewle potu wyoptota. 17 Gi rixanu Moysisiya reneeka Tokanchi Yokanatkaluru. Wa Geso Kristo chinanu rawa gimutlewlu ga wa galikakpotunanu tokanchi. 18 Gikena getlu Goyakalu gi pagogneko. Girchistsi gwachri, satupjerutu Gituru, Wale ginkakletlu.

*Gwa Katlewakleru gipgujtale*

19 Tyenwa Gwa gipgujtale, wa Goteyone yokanatinikana Gerosaleya sasertotene ga wa Rewinane repomgiyapluna, “¿Giryi pixa?”

20 Rupgujetnawa Gwa. Gi wa nutatnawa. Rupgujetnawa, “Gi wa Kristono gita.”

21 Repomgaluna, “¿Klunerkoxni? ¿Giliyaklayge pixa?”

Wane china, “Gi waleno.”

“¿Wa tokanchi geneklewatachrirayge?”

Rugita, “Gike. Gi waleno.”

<sup>22</sup> Giyagni wane chinruna, “¿Gi gixachriyi? wunkakyapna wyokanatjene. ¿Gi pchinnawa pixinanuko?”

<sup>23</sup> Wane china:

“*Gitni giplaji yineru mwiyawakanu saplewatyachrino,*  
*wane chinachrino:*  
*Mpotukatanru Gitsrukaachigapo,*  
wa Gisayiya tokanchi geneklewatachri chinyawaka.”

<sup>24</sup> Wa yokanatkalune, Gwariseyonenu.

<sup>25</sup> Repomgaluna. Wane chinruna, “¿Klu koxa pkatlewatywa, wa Kristomigjekyi, gi wa Giliyyi, gi wa tokanchi geneklewatachrikoxyi?”

<sup>26</sup> Gwa gigitna. Wane chinna, “Gita katlewata gonuya. Seyni gixatskala rawa wa gixa mumatanutu. <sup>27</sup> Walenwa gita gajxigi ginachri. Gi wa gita gimukluni wa nkoshpirokyaplu yoshmaklejixitsa.”

<sup>28</sup> Tyekaka wane gixkaluru Wetawara Pokchi, Gorta wakanute, wa Gwa katlewjetyawaka.

### *Getanru Gowega Wgene Goyakalunu*

<sup>29</sup> Waleprikogne Gwa getlu Geso wale yegi yachri. Wane china, “Getanru Gowega Wgene Goyakalunu, tye psolchijneko gajene konmukochiretachri. <sup>30</sup> Tyenwa nchinjenatanru, satu jeji najxigi ginachripa, Walenwa muchichachri gitaya, gi rixanu muchinanu gwachrini gitaya. <sup>31</sup> Gi numatanatlu. Seyni wa rumatikolupa Gisrayiline yegi, giyagni nuna gita nkatlewatinripa gonuya.”

<sup>32</sup> Wa Gwa gipgujtawata. Wane china, “Netlu Giwekikaluru tengogne gijrukyachri. Motkoko

pixka rixa Geso gogo gwachri. <sup>33</sup> Gi numatanatlu, seyni wa nyokanatjeru gonu nkatlewatiripa, Wale wane chinno, ‘Wa Giwekikaluru peta gijruklegogwakatanru, Wale gogwaka gwachri, Walenwa Giwekikaluru Kpashiri katlewatyachri.’ <sup>34</sup> Gita getlu. Nunkakletlu Tyenwa Goyakalu Wgene.”

### *Muchichachine Geso yimaklene*

<sup>35</sup> Waleprikgogne rumepe tunwaleta Gwa, ga wa gepi yimaklene. <sup>36</sup> Rushinga yaletinri Geso, wane china, “Getanru gowega Wgene Goyakalunu.”

<sup>37</sup> Gepi yimaklene yijnako yanumsaletlu. Romk-agitkatluna Geso. <sup>38</sup> Ruprotaka Geso. Retna rawgajxigitjene. Wane chinna, “¿Klu gijga?”

Wa wanna wane chinru, “Rawi (walenwa yokaakaluru, Yimaklewatachri), ¿ginaka pwa?”

<sup>39</sup> Wane chinna Wale, “Ginanu. Getapanru.”

Wane yana. Retluna ginakakta rawa. Walgogne rutukna Wale yegi. Kayinwakpapakotkani.

<sup>40</sup> Wa gepi Gwa yijnakotachine, romkagitjene, satni Gantirishi Simo Petro gepuru. <sup>41</sup> Gantirishi gikshikgapkatlu waleko yegwaklu Simo. Wane chinru, “Wukshikatkalu Mesiya.” Walenwa yokaakaluru Kristo.

<sup>42</sup> Geso yegi raniklu. Geso getlu. Wane china, “Pixni wa Simo, Gona wgene. Pixa giwakatko Sega. (Walenwa yokaakaluru Sotlu.)”

### *Geso tomgana Wilipi, Natanayli*

<sup>43</sup> Waleprikgogne Kalile raluka yaleta Geso. Rukshiklu Wilipi. Wane chinru, “Pomkagitanno.”

44 Wetsayta Pokchi gajerni Wilipi. Walenwa Gantirishi ga wa Petro pokchi. 45 Wilipi gikshiklu Natanayli. Wane chinru, “Wukshikatkalu Moysisi yonyegitanru Tokanchi Yokanatkaluruya, ga wa tokanchi geneklewatachine koxa yonyegitanru. Gesni, wa Gosi wgene, Nasare Gajeru.”

46 Natanayli wane chinru, “¿Nasarege rumkata giyakletya pagixanu kigleru?”

Wilipi wane chinru, “Punanu. Petapanru.”

47 Geso getanataplu Natanayli. Wane chinyegitlu, “Getanru satu galikakotunanu Gisrayili. Walenwa mayrokletu.”

48 Natanayli wane chinru, “¿Ginaka pumatyano?”

Geso gigita. Wane chinru, “Wilipi ma tomgakanuwayi, wa gikera rapukote pwanatini, netyi.”

49 Rugita Natanayli. Wane chinru, “Rawi, Pixni Goyakalu Wgenyi. Pixni wa Gisrayiline Pogiryi.”

50 Geso gigitlu. Wane chinru, “Gi rixanu wane nchinyi, ‘Netyi wa gikerampukoya,’ ¿palixge? Tyekaka pnute tsru petanu.” 51 Wane chinru, “Galikakni, galikakni wane nchingi, xanikakayakawa getanru tengogne gitpukinri, ga wa Goyakalutowrene gatskomtachine, gijrukamtachine Gita Yineru Wgenno yegi.”

## 2

### *Kashimyolu Kanaya*

1 Waleprika pnutgogne waneru kashimyolu Kana Pokchiya, Kalilesreta. Wanero Geso ginro.

<sup>2</sup> Chanixka koxa Geso ga wa yimaklene kashimyolu yegi. <sup>3</sup> Winga magata. Wa Geso ginro wane chinru, “Winga maleshayna.”

<sup>4</sup> Wane chinro Geso, “¿Gi rixno Gita ga wa pixa, suxo? Gi rapokawa nopapko.”

<sup>5</sup> Runro wane chinna gipxaklewatachine, “Gkamrutanru klunerukokta runkakyagi.”

<sup>6</sup> Wanenanru patsrujire sotlu gashgaji, wa powratjetyawakna Goteyone. Gepi, mapa yokmajtagapi jigloklu satkaka.

<sup>7</sup> Wane chinna Geso, “Ntseptaganru gonu tyekaka gashgaji.” Tseptogapotutluna.

<sup>8</sup> Wane chinna Wale, “Nsajikgatanru xani. Nikikwaka chinanuwyachri ganikyegitanru.”

Ranikyegitluna. <sup>9</sup> Wa retumginitkalo chinanuwachri gonu kamrutikaluro winga, gi rumata ginaka tuyakaty, seyni wa gipxaklewatachine gonga saajegatachine gimata. Wa chinanuwachri tomgalu gnurowatachri.

<sup>10</sup> Wane chinru, “Pejnuruko yineru muchinanu rutaklo kiglero winga. Wa rumetinitkana rutakatkalo mugletotka. Ga wa pixa gimretlo xangongenanu kiglero winga.”

<sup>11</sup> Tyenwa muchinanu getkaluru kamruta Geso Kanaya, Kalilesretaya. Rekekigigoyaknuta. Ga wa yimaklene galixlu. <sup>12</sup> Wale gowukshini yopika. Kapernawo yatka Wale ga wa runro, ga wa repurune, ga wa yimaklene. Gi gixgogne wane rawna.

### *Geso powratlu kphasiwakapji*

<sup>13</sup> Gi gowukatkalu Tsru Giknoglushgogne Goteyonenu. Gerosale kanika Geso. <sup>14</sup> Kphasiwakapji retyana wakane gishanretjetachine, ga

wa gowegane gishanretjetachine, ga wa motkokone gishanretjetachine, wanepnute gipekserojiprojkachine tuplatachine.

<sup>15</sup> Kochipjerewapitsa kamruta. Kpashiwakapji rerutyana pejnuruneko, ga wa gowegane, ga wa wakane. Rupkakyanna serojiprojna wa kgipekoklerune. Yawnajkaklo gikwalna.

<sup>16</sup> Motkoko gishanretjetachine wane china, “Gkoshpanro wala gewiya. Gi wa Nurupjiko marnewakapji gkamrutini.”

<sup>17</sup> Giyagni yimaklene gishinkaplu yonatkalurni: *Wane nixa jmerpotno pupji chinanu.*

<sup>18</sup> Wa Goteyone wane chinru, “¿Klu getkaluru pekagitwu wa tye pkamrutinri?”

<sup>19</sup> Rugita Geso. Wane chinna, “Gnikatanru tye kpashiwaka potu, ga wa mapgogne chininri ntunotakanru.”

<sup>20</sup> Giyagni wane chinna wa Goteyone, “Gepko-amkojmole patsrujire walapu kamrupjinatkaluru tye kpashiwaka potu, ga wa Pixa ¿mapgognepje ptunotakanru?”

<sup>21</sup> Seyni Wale wane chinyegitlu gimanepirana kpashiwaka potu. <sup>22</sup> Giyagni wa yotunotinitka gipnachinetskalaya, yimaklene gishinkaplu wa wane chinjenatinri. Ralixluna wa yonatkaluru, ga wa Geso chinyawaka.

### *Geso gimatgajitna pejnuruneko*

<sup>23</sup> Tsrú Giknoglushgogne, meyiwlugogne, Gerosale rawanatini gixo galixgiwakatlu. Retanatlna wa getkalurkaka kamrutini.

<sup>24</sup> Waleko Geso gi gaponshinikanyegitnawa wannayegiya, gi rixanu Wale gimatna pejnuruneko. <sup>25</sup> Gi wa magatya wa satu

gipgujtatyaplu yineru, gi rixanu Waleko gimatlu yineru gaji gwachri.

### 3

#### *Geso ga wa Nikotemo*

<sup>1</sup> Wanenanru jeji satu Gwariseyo, Nikotemo gi-wakatletachri. Goteyone gitsrukate. <sup>2</sup> Tyenwa goyecho no yayegitlu Geso. Wane chinru, “Rawi, wumatyi Goyakalu yegi ginyachriyi yimaklewatachri pixinripa. Gi rixanu gike gimkata kamruretlu tyekaka getkaluru wa Pixa kamrutanrukaka waleyma ma mixkanumka Goyakalu.”

<sup>3</sup> Rugita Geso. Wane chinru, “Galikakni, galikakni wane nchinyi, wa mumepe gishpakletkatu gi rumkata getletlu Goyakalu pogirewatyawaka.”

<sup>4</sup> Nikotemo wane chinru, “¿Gi rixpoko gishpakletatnaka satu jeji tsrutsolejinatka? ¿Rumkatge gimepe jiglokletanutnaklu runronanwaka, rushpakinripatnaka?”

<sup>5</sup> Rugita Geso, “Galikakni, galikakni wane nchinyi, satu ma wugenetikmaka gonuya ga wa Giwekikaluruya, gi rumkata jiglokletanru Goyakalu pogirewatyawaka. <sup>6</sup> Ga wa

manchi gishpakyachri manchini wale, ga wa Giwekikaluru gishpakyachri, giwekikalurni wale. <sup>7</sup> Gi wa puglajitanu wa wane nchinyayi, gimkata gimepe gishpakletanutnaka. <sup>8</sup> Wa

kannipgyalu ginakakta raluka wane yannipgyata. Pyijnakpogimnutlu, seyini gi pumata ginakakta runya, ga wa ginakakta yanu. Wane rixa pejnuruko Giwekikaluru gishpakyachri.”

<sup>9</sup> Rugita Nikotemo. Wane chinru, “¿Gi rixpoko wane gixkotanu?”

<sup>10</sup> Rugita Geso. Wane chinru, “¿Pixni wa Gisrayiline yimakachriyi, ga wa gi ge pumatlu tyekaka? <sup>11</sup> Galikakni, galikakni wane nchinyi, wa wumatanru wane wchina, ga wa wetanru wupgujtata. Gi gyoptotlu wupgujtatanru. <sup>12</sup> Wa nunkakingi tyechijne gajerupirankaka, gi galixa, ¿gi gixpokotyawaka galixini wa tengogne gajerupirankaka nunkakingi? <sup>13</sup> Gike gatskotlu tengogne, seyni wa tengogne gijrukyachripje, Gita wa Yineru Wgenno tengognerutno. <sup>14</sup> Moysisi pixka yotunkakinri wa gimnu yineru mwiyawakanuya, waneko pixka nixa: numkata yotunkaakotanu Gita Yineru Wgenno. <sup>15</sup> Wa pejnuruneko nalixjene ma mamginitipa, seyni waneyapna ruwekinrina gike rixiniko mnikawnakatuu.

### *Ralukyapogna Goyakalu tye psolchijne gajeneko*

<sup>16</sup> “Wane rixa galuklepotutna Goyakalu tye psolchijne gajeneko, giyagni renekna satupjerutu Gituru, wa pejnuruneko ralixjene ma mamginitipa, wa waneyapna ruwekinrina gike rixiniko mnikawnakatupa. <sup>17</sup> Gi rixanu Goyakalu gi yokanatlu Gituru tyechijne ruklukanuwnayegjixyapna tye psolchijne gajeneko, seyni wa tye psolchijne gajeneko gognetkakikolupa Wale chinanu. <sup>18</sup> Wa Gita galixachri gi ruklukanuwnayegjixko. Seyni malixakletu ruklukanuwnayegjixkanatka gi rixanu gi ralixgiwakatno Gita Goyakalu

Wgenno satupjerutu. <sup>19</sup> Tye chinanu Goyakalu giklukanuwnayegjixanru yineru, wa tye psolchijneko runa pokamlalu, ga wa yine galukpotutlu mapshagwaka pokamlalu pnute, gi rixanu mugletni wa kamrurna. <sup>20</sup> Wa pejnuruneko mugletu kamrutachine gagnanutlu pokamlalu. Gi wa pokamlalu yegi yana ma mekakgi giklukanuwnaletiketupna kamrurna. <sup>21</sup> Wa poyagkakachrii yayegitlu pokamlawaka, rekakgi kamruretikolupa Goyakaluya wane gixka.”

### *Gnunrowatachri galukjeru*

<sup>22</sup> Wanepnute Gotechijne ya Geso yimakleneyma. Wane rawjenatini wannayma. Katlewjixa. <sup>23</sup> Katlewata koxa Gwa Genoya, Sali Pokchistsi, gi rixanu wane rawa gixo gonu. Wane yana. Katkalune. <sup>24</sup> Gi rixanu gi wa yoshmaklewjetikwaka rutaakawa Gwa. <sup>25</sup> Gwa yimaklene gigjekaka satu Goteyoyma powratjetikwakapiranaya. <sup>26</sup> Yayegitluna wa Gwa. Wane chinruna, “Rawi, wa Gorta wakanute pixaymalutunanu, wa pupgujtajenatanru, petanru, katlewjixa. Ptowrunpotunanuko yayegitlu.”

<sup>27</sup> Rugitna Gwa. Wane china, “Gike rumkata yoptoleta yineru, seyni walepje wa Goyakalu genekyalu. <sup>28</sup> Gixakni wa nupgujtatjengi wane nchinre, ‘Gi wa Kristono gita,’ seyni gitni wa yokanatkalurno Kristo penutete. <sup>29</sup> Wa gnunrowatachri walenwa kganunrolu, Kristo pixka

waneylu ralixjene. Wa gñunrowatachri galukjeru, walestsi gwachri, pixka nixa gita. Ralukjeru yijnakotlu gñunrowatachri tokanu, ga wa rumuwpotuta tokanu chinanu. Waneko pixka nixa gita. Numuwpotuta Kristo chinanu. <sup>30</sup> Rumkata tsru gixleta Wale, ga wa gita giyagokananumtanu.

### *Teno giyakatyachri*

<sup>31</sup> “Ga wa teno giyakatyachri pejnuruneko pnute tsruni Wale. Ga wa chiji giyakatyachri, chiji gajerni wale. Tye chiji gajerupirana runkakleta. Ga wa tengogne giyakatyachri pejnurune pnute tsruni Wale. <sup>32</sup> Ga wa retanru, ga wa yijnakotanru Wale rupgujtata. Gike yopto gipgujtaletlu. <sup>33</sup> Yopto gipgujtaletjeru runkakpokowakyegitlu wa Goyakalni wa poyagkakachri. <sup>34</sup> Gi rixanu wa Goyakalu yokanatanru, Kristo, Goyakalu tokanu runkakleta. Gi rixanu gi reneklu Goyakalu Giwekikaluru kyagolu. <sup>35</sup> Ruru galuklu Gituru. Ptowrunanuka reneklu gimyoya. <sup>36</sup> Wa Goyakalu Wgene galixachri waneylu ruwekinri gike rixiniko mnikawnakatu. Seyni wa Goyakalu Wgene malixkatu gi retanru ruwekinri, seyni Goyakalu jigekanuwyeeegognenatlu.”

## 4

### *Gakowni jitotkomgalestsi tuplatinri Geso*

<sup>1</sup> Giyagni wa Geso gimatlu wa Gwariseyone yijnakyegitlu Gwa pnute rixna yimaklene Geso. Katlewjixna. <sup>2</sup> Gimka katlewata Geso, seyni yimaklenepje katlewata. <sup>3</sup> Giyagni Gote rushpakya. Kalile satokanutnaka.

<sup>4</sup> Samarya rumkata yaplemta. <sup>5</sup> Giyagni wane rapoka papokchi Samarisreta, Sicha chinkaluru pokchi, wanestsi wa Gakowo genekchijityalu gituru Gosi. <sup>6</sup> Waneru Gakowni jitolkomgale. Giyagni Geso gama yagapleta. Wane tuplata gitkomgastsi. Tumananutkani.

### *Samari gajero*

<sup>7</sup> Samari gajero sato suxo gina sajkapgatachropa. Wa Geso wane chinro, “Putanno.” <sup>8</sup> Gi rixanu yimaklene pokchi yatkana. Ragjitapluna niikaluru.

<sup>9</sup> Samari gajero wane chinru, “¿Gi pixkatge Pixni Goteyyi pagjitno wa nutyapyi, gitni wa Samari gajerno?” Gi rixanu Samaritanoneyma gi rumatletkakna Goteyone.

<sup>10</sup> Rugita Geso. Wane chinro, “Pixamka gitatanru Goyakalu genekashle ga wa Girni wa wane pchinjeru, ‘Putanno,’ pixa gagjitanmaklu Waleya. Walemka genekanyi gonu giwekachri.”

<sup>11</sup> Suxo wane chinru, “Gitokopna rawatkomgata. ¿Ginaka pguta waneyyi wa gonu giwekachri?

<sup>12</sup> ¿Pixlege wa wutsrukatni Gakowni pnute tsurayge, wa tyetkomga wenekjerni, waleni koxa giiru, ga wa wugenene, ga wa giprane?”

<sup>13</sup> Rugita Geso, “Pejnuruneko tye gonu girachine, rumepe gonunnagatlewletanatnakna.

<sup>14</sup> Wa girukta girinri wa gonu Gita genekyaplu gi pagogneko ronunnagatewatanutnaka. Seyni wa gonu Gita genekyaplu gonutkomga pixka rixnanwakatanu, rushpakgatinri ruwekinri chinanu gike rixiniko mnikawnakatupa.”

<sup>15</sup> Suxo wane chinru, “Nutsrukate, penekanno tye gonu, gikekni gi nonunnagatewatanutka. Gi koxa gewi nsajkapinitka.”

*Goyakalni Giwekikaluru*

<sup>16</sup> Geso wane chinro, “Ptomgapanru pganuru. Ginanu gewi.”

<sup>17</sup> Suxo gigita. Wane china, “Gi kganurno.”

Geso wane chinro, “Wanepotuko pchina, ‘Gi kganurno,’ <sup>18</sup> Gi rixanu pamyo pganurtapa. Ga wa xani wanerutu pganurmaka, gi wa pganurni. Galikakpotunanu wane pchinno.”

<sup>19</sup> Wane chinru suxo, “Nutsrukate, netyi tokanchi geneklewatachriyi. <sup>20</sup> Wutsrukateni tye magkate yonogyegitni. Wa gixa wane china, Gerosale gimkata yonogjetikwaka rixinripa.”

<sup>21</sup> Wane chinro Geso, “Suxo, palixanno, gi-papko ginanu, gi wa tye magkateko, gi wa Gerosaleko gixa yonogyegitanru Girchi. <sup>22</sup> Gixa yonogyegitlu gma mumatanutu. Wixa yonogyegitlu wumatanru. Gi rixanu Goteyone yegi ruyakaty gognewatikaluru. <sup>23</sup> Seyni gipapko ginanu, xawaknitkani, wa galikakpotunanu kyonogiklerune yonogyegitanruna Girchi psolu rajyakoyna, galikakpotunanu. Gi rixanu Girchi gijgakoxna wane gixachine yonogyegityapluna. <sup>24</sup> Goyakalni Giwekikaluru, ga wa yonogyegitjene Giwekikaluruya galikakpotunanu, rumkata yonogyegletluna.”

<sup>25</sup> Wane chinru wa suxo, “Numata gita wa Mesiya gininripa—Walenwa Kristo chinkaluru—wa Wale gininipa runkakanwu ptowrukopirana.”

26 Geso wane chinro, “Walekno Gita giynum-satyi.”

*¿Kristo getkokatkanwa Wale?*

27 Wane rixanatawa rapokna yimaklene. Ruglajitna wa suxo ruynumsanatinri. Seyni gi satuna wane china, “¿Klu paluka?” waka “¿Klu puynumsatyalo wala?”

28 Giyagni wa suxo tuknokgashgajremtarka. Pokchi tyatka. Wala wane chinna jejine, 29 “Ginanu. Getapanru satu jeji, wa pejnuruko nixyawaka nchinjeru. ¿Kristo getkokatkanwa Wale?”

30 Giyagni pokchi yiyatkana. Yayegitluna Wale.

*Jirgikolu*

31 Wanekopshini ragjitluna yimaklene. Wane chinruna, “Rawi, nikanutka.”

32 Wale wane chinna, “Waneyno nnijitu nnikanrupa wa gixa mumatanutu.”

33 Giyagni wa yimaklene wane chinkakna, “¿Satu getko gwapnijitutlu?”

34 Wane chinna Geso, “Nnijitni wa nkamrutanru nyokanatjeru gishinikanru, ga wa nnikatyaplu kamrure. 35 ¿Gi ge wane nchina gixa, wa gepkoxamkoje ksuru magatiniwa rapokinripa wa jirgikolu? Giyagni Gita wane chinyagi, ntunogitanu. Getanru trikosha. Rutlikagwutarka jirgikolpatka. 36 Jirgachri yoptotlu wenutikolu. Rapatjetlu wenutikolu gike rixiniko mnikawnakatupa, wa gitakachri koxa ga wa jirgachri koxa rumuwatinripna. 37 Gi rixanu tye chinanu galikakpotunanni wa tokanchi, ‘Satni wa gitaklewatachri, ga wa satni wa jirgachri.’

<sup>38</sup> Wa Gitni wa yokanatgi gjirgiyaplu wa gixa ma kamruretanutu. Pimrine yaprewpotuta, ga wa gixa kashrigna wanna kamrurenanu.”

### *Gixo Samari gajene galixa*

<sup>39</sup> Wa gixo Samari gajene wale pokchi gajene galixlu suxo tokanu chinanu, gipgujtalewatachro. Wane china, “Runkakyano pejnuruko nixyawaka.” <sup>40</sup> Giyagni Samari gajene runyegitinitkaluna, ragjitluna wane rutukinripachi. Wane rutuka gepgogne. <sup>41</sup> Gixo wanepnute galixa Geso tokanuya.

<sup>42</sup> Wane chinrona suxo, “Gi wa ptokanuya walixatka, gi rixanu wixpotuko jematkalu. Wumata galikakpotunanu rixinri Tyenwa wa tye psolchine gajeneko gognetkakachripatka.”

### *Kalile yatnaka Geso*

<sup>43</sup> Gepgogne chininri wane rushpakya. Kalile yatka. <sup>44</sup> Gi rixanu Waleko Geso gipgujtatlu wa tokanchi geneklewatachine gichijneyna gi wa kagwakpiratikna. <sup>45</sup> Giyagni Kalile rapokinitka, wa Kalile gajene yoptotlu, gi rixanu wa Gerosaleya retjetluna pejnurkakako wa tsrugogne kamrutanru. Gi rixanu wanna koxa wane ya meyiwlu yegi.

### *Pogirchi gitakanru wgene gituukaaka*

<sup>46</sup> Giyagni Kana yatnaka Geso, Kalilesreta, wa gonga winga kamrutyawaka. Kapernawo rawanata satu pogirchi gitakanru. Wale wgene yayixa. <sup>47</sup> Wale yijnakyegitinitkalu Geso Gote ruyakatyatka. Kalile rapokatka. Geso yegi ya. Ragjitlu yopikinripa rutuukakyaplu gituru, gi

rixanu rupnakastsinatani. <sup>48</sup> Giyagni Geso wane china, “Gma metkamkalu getkalurkaka, ga wa koglajrukaka, gi galixanu.”

<sup>49</sup> Pogirchi gitakanru wane chinru, “Nutsrukate, pyopikanu ma mupnakanuwa noturu.”

<sup>50</sup> Wane chinru Geso, “Pyanutka. Puturu giweka.”

Wa jeji galixlu wa tokanchi Geso wane chinyalu. Yatka. <sup>51</sup> Wa yopikamtinitka wayegrene gishpakamta yoptotpatkaluna. Runkakluna. Wane chinruna, “Puturu giweka.”

<sup>52</sup> Giyagni repomgana gipapko yinuwaka giglewleta. Wane chinruna, “Kapetgogne rutmayitini, rupachwalgatka.”

<sup>53</sup> Giyagni ruru gimatlu wanepapkonwa Geso wane chinru, “Puturu giweka.” Ralixa wale, ga wa pejnuruneko gipji gajene.

<sup>54</sup> Wa tye gepi chininri getkaluru kamrutatnaka Geso, Gote ruyakatinitka. Kalile yinitka.

## 5

### *Yayixachri, Wetesta gajeru*

<sup>1</sup> Wanepnute meyiwlugognetnakni Goteyonenu. Gerosale kanika Geso. <sup>2</sup> Wa Gerosale, gowegane gipgyaptotetsi, waneru kawjetikwaka. Gewreyone tokanu wane chinika Wetesta. Wale waneya pamyotamnukaka.

<sup>3</sup> Wane ruklagna gixolune yayixachine, maygalene, yokmatachine, giprigmanetachine. Kagwakluna rakaykokgatilolupa gonu. <sup>4</sup> Gi

rixanu gipapko gapokini Gitsrukaachitowreru gijrukini kawjetikwaka. Rakaykokgatlu wa

gonu. Rali gakaykokgatkoklunutka wa gonu, muchinanu gijrukgatachri kawjetikowakaya, wale gituka gi gixachrikokta yayixlu chinanu. <sup>5</sup> Wanenanru satu jeji mapamole yokgipi walapu yayixachrinatka.

<sup>6</sup> Wa Geso getinri tye giklugachri, wa rumatinri gowukshini potu wane rawinri, wane chinru, “¿Paluka ginglewletge?”

<sup>7</sup> Rugitlu wa yayixachri, “Gitsrukaachi, maleshayanno jeji nyoshmakjerupmaka wa kawjetikowaka wa rakaykokgatkoklunupa gonu. Wa nunakopshini gita satu gijrukgata muchinanu gitaya.”

<sup>8</sup> Wane chinru Geso, “Pyotunotanu. Pkoschekjekotanu. Pyanutka.” <sup>9</sup> Waneklu ruglewatatka jeji. Koschekjekotatka. Yanamtatka.

### *Geso jigyegitka wa gapnanutikalurgogne kaspukapgutatinri*

Gapnanutikalurgognewa walegogne. <sup>10</sup> Giyagni wa Goteyone wane chinru wa gigitkalurutka, “Gapnanutikalurugognewani. Ginanshichkalurni wa panikjekotinripa.”

<sup>11</sup> Wale gigitna, “Nugletjeru Walepotuko wane chinno, ‘Pkoschekjekotanu. Pyanutka.’ ”

<sup>12</sup> Giyagni repomgaluna, “¿Giru jejni wa wane chinyi, ‘Pkoschekjekotanu. Pyanutka?’ ”

<sup>13</sup> Wa gigitkalurutka gi gimatlu gi gixachritkani. Gi rixanu Geso gixirikamta, gi rixanu gi gepikna yine wane.

<sup>14</sup> Wanepnute kpashiwakapji Geso gikshikyalu. Wane chinru, “Petinwa. Pugletikolutka. Gi

wa wanepnuteko pmukochirewatanutka, wane pnuterutu ma munyegityanpatkayi.”

<sup>15</sup> Wa jeji galimta. Runkakapna Goteyone, Gesoktanwa rugletjeru. <sup>16</sup> Wale chinanu wa Goteyone kojwakananumtlu Geso. Raluka giy-laletluna, gi rixanu wa tyekaka kamruta gapnanutikalurgogneko. <sup>17</sup> Wa Geso wane chinna, “Xangognenanu kamrurewata Nuru, ga wa Gita koxa kamrurewata.”

<sup>18</sup> Giyagni wale chinanu pnute raluka giy-laletluna Goteyone, gi rixanu gi wa gapnanutikalurgognepje gi rapnanuta, seyni wane china Ruru potu rixinri Goyakalu. Goyakaluko pixka rixnawa.

### *Goyakalu Wgene gitakikolu*

<sup>19</sup> Giyagni Geso gigita. Wane chinna, “Galikakni, galikakni, wane nchingi, gike rumkata kamrureta Walepje rixini Gituru, seyni wale rumkata wa Ruru reta kamruretanru, gi rixanu klunerukta kamruta Goyakalu, Gituru koxa waneko pixka gixa kamruretlu. <sup>20</sup> Gi rixanu Girchi galuklu Gituru. Rekakgitlu pejnurkakako Wale kamrutanru. Tyekaka pnute tsru kamrurchi rekakgitanru wa gixa giglajitinripa. <sup>21</sup> Gi rixanu Girchi wane gixa yotunkakletna gipnachine. Ruweekakna. Waneko pixka koxa rixa Gituru. Girukokta raluka giweekakleta, ruweekaklu. <sup>22</sup> Gi rixanu Girchi gikena ruklukanuwnayegjixa. Seyni pejnuruko giklukanuwnayegjixlewlu reneklu Gituru. <sup>23</sup> Kagwakpiratyapluna Ruruko pixka wa Gituru wa pejnuruneko. Wa Gituru

mkagwakpiratkatu, gi koxa kagwakpiratlu Girchi wa yokanatjeru.

<sup>24</sup> “Galikakni, galikakni wane nchingi, ntokanu yijnakotachri, nyokanatjeru galixachri waneylu ruwekinri gike rixiniko mnikawnakatu. Maleshayaplu ruklukanuwninripa. Gipnaluya rushpakamtya. Jigloklu giweklu. <sup>25</sup> Galikakni, galikakni wane nchingi, rapokanu gigogne, xawaknini wa gipnachine yijnaktokanutinipno Gita Goyakalu Wgenno. Yijnakotachine giwekanu. <sup>26</sup> Gi rixanu Girchi waneylu giweklu Walenanuko. Reneekoxlu Gituru waneko pixka nixinripa wa waneyapno giweklu Gitananuko. <sup>27</sup> Rutaakoxno nuklukanuwnayegjixlewatinripa gi rixanu Yineru Wgenno.

<sup>28</sup> “Gi giglajitanu tyeya, gi rixanu rapokanu gigogne wa pejnuruneko yomlechi gwachine yijnaktokanutanno. <sup>29</sup> Kigleru kamrutachine gishpakanu yotunruyapa ruwekinripna. Wa gektutu kamrutachine yotunotanna ruklukanuwnayegjixikolupna.

### *Kristo gipgujtachine*

<sup>30</sup> “Gike numkata kamrureta Gitapje nixini. Nyijnakotyawaka waneko pixka nixa giklukanuwnayegjixlewleta. Wanepotukni wa nuklukanuwnayegjixlewle. Gi rixanu gi nujgalu Gitako nushinikanru, seyini wa nyokanatjeru gishinikanru. <sup>31</sup> Wa Gitnanuko gipgujtatinwa, wa nupgujtalewle gi wa galikakpotunanni. <sup>32</sup> Satni wa gipgujtatno. Numata Gita wa rupgujtatanru Gitaya wanepotukni wale.

<sup>33</sup> “Gixa yokanatna yine Gwa yegi. Wale gipgujtatlu galikakpotunanu tokanchi. <sup>34</sup> Gi wa nyoptotlu wa yineru gipgujtalewle. Seyni tyekaka nchina wa gixa gognetkakilolupa. <sup>35</sup> Gwanwa katalu xirnachri, pokamlatachri. Wa gixa galuka gimuwlepotuta pshinitsonu pokamlanuya.

<sup>36</sup> “Waneyno Gita tsru potu gipgujtalewlu Gwanu pnute. Gi rixanu Girchi genekyano kamrurchi npoyagkakinripa. Waleko kamrurchi nkamrutanru, waleko gipgujtatno wa Girchi yokanatno. <sup>37</sup> Wa nyokanatjeru Girchi Walekni gipgujtatno Gita. Gi pagogneko gjemaplajitlu gixa. Gi koxa getgetkowakatlu. <sup>38</sup> Gi koxa waneygi tokanu gaji gwachri. Gi rixanu Goyakalu yokatanaruno, wa Gita gixa ma malixanutno. <sup>39</sup> Getjepotutanru yonatkaluru tokanchi, gi rixanu gixa kagwaka waleya waneyapgi giwekinri gike rixiniko mnikawnakatu. Wale tokanchinwa gipgujtatno Gita. <sup>40</sup> Gixa gi galuka ginyegletno waneygi gixinripa giwekinripa.

<sup>41</sup> “Gi nyoptotlu gimalwuru yineya.

<sup>42</sup> “Seyni Gita gimatyegitgi wa maleshaygi Goyakalu galuklewle gixa gwachri. <sup>43</sup> Gita gina Nuru giwakaya. Gi gyoptotno. Satumka ginanu waleko giwakaya, wale gyoptotanu. <sup>44</sup> ¿Gi gixpoko galixleta gixa, gixkakluko gimalwukakinri? Gi gijgalu wa satupjerutu Goyakalu kigle getle rixyapgi.

<sup>45</sup> “Gi wa gyanshinikanutanru wa Gita jigyegitangi Girchiyegiya. Waneru gjigyegitjerupa. Moysisni wa gixa kagwakanshinikanutanru. <sup>46</sup> Gi rixanu gixa galixanmaklu Moysisi, gitkoxmaka galixanu. Gi rixanu Gitapirana yonyegita wale.

<sup>47</sup> Gma malixiniplu wale yonatanru ¿gi rixyawaka galixtokanutinno?”

## 6

### *Pamyo waragkane reta nachneta*

<sup>1</sup> Wanepnute Kalile tsru wenne wakanute yatka Geso. Walenwa Tiwerya wenne. <sup>2</sup> Gixolune yine gomkagitlu, gi rixanu getkalurkaka retina, Wale kamrujetanru yayixachineya. <sup>3</sup> Magka kanika Geso. Wane tuplata yimakleneyma. <sup>4</sup> Gi gowukatkalu Tsru Giknoglushgogne, Goteyone meyiwatinrigogne.

<sup>5</sup> Giyagni tunogiygaleta Geso. Retna gixolune yine ginyegityawaklu. Geso wane chinru Wilipi, “¿Ginaka wagjitapinro jimapro wa nikinripna wanna?” <sup>6</sup> Yantaletyalu wane chintokanuta, gi rixanu Wale gimatlu kamrutanrupa.

<sup>7</sup> Wilipi gigitlu, “Gepi pacha wenroluto jimapro gi poyagotanu satkaka ptsotsotajkaka yoptotinripna.”

<sup>8</sup> Satu yimakleru Gantirishi, Simo Petro gepuru, wane chinru, <sup>9</sup> “Gewlu satu mturu waneylu pamyo jimapro triko pixkalutu kamrutikaluru, ga wa gepi shima. Seyni ¿klu kigleylu wane pejnurune chinanu?”

<sup>10</sup> Giyagni Geso wane china, “Ntuplakakanna yine.”

Waneru tsru peklomta. Tuplatna. Pamyo waragka getko jejine. <sup>11</sup> Giyagni Geso gwalo jimapro. Rali poyagnutletinri, Wale geneksatna

yimaklene. Wa yimaklene geneksatna tuplatachine. Waneko pixka rixlo shima ralukyawakpotukna.

<sup>12</sup> Wa jinanu rixinitkana, wane chinna yimaklene, “Gapatjetanru wa gixetachri psojkaka gike ma salewninitipa.”

<sup>13</sup> Giyagni rapatjetluna. Pamole gepi kojita tsepotna psojkaka wa pamyo jimapro triko pixkalutu kamrutikaluru, ruxetanruna nikanatachine.

<sup>14</sup> Giyagni wa jejine getinri getkaluru wa Geso kamrutanru, wane chinna, “Tyenwa galikakpotunanu tokanchi geneklewatachri tyechijne ginachripa.”

### *Tsru wenu gogote yapamta Geso*

<sup>15</sup> Giyagni rumatini Geso wa rushinika kashretyapluna pogirna rutakyapluna, ruxrikamtatnaka. Magka ya Walepje.

<sup>16</sup> Kayi chininitka. Yopikamtna. Wenu yana yimaklene. <sup>17</sup> Kanawa ruptekna. Tsru wenu wakanute, Kapernawosreta, yanna. Mapshagatkalu. Gi wa runyegitawana Geso. <sup>18</sup> ¡Gi psoshpurgananuktalu tsru wenu, tsru rawokannipgyale chinanu! <sup>19</sup> Giyagni ranikgatnimkatkana. Gepi waragkastsi, mapa waragkastsi getko gowuknu yatkana. Retluna Geso. Tsru wenu gogote yapamta. Gi gowukatkalu kanawa yegi. Pikanna.

<sup>20</sup> Wa Wale wane chinna, “Gitni. Gi mpikanu.” <sup>21</sup> Giyagni raluka yoptoltapluna kanawayaya. Wanekluyakawa tutspaka kanawa rushinikyawakna chiji.

### *Gixolune yine gijgalu Geso*

<sup>22</sup> Waleprika gixolune yine tsru wenu wakanute gwachine getlo maleshlo sato wanepnute kanawa. Satopjero. Ga wa Geso gi gipteklo wala yimakleneyma. Wa yimaklenepje yatka. <sup>23</sup> Seyni wa Gitsrukaachi gali poyagnutletlo jimapro, Tiweryawnaga tuknogamtya kanawkaka. Tiwerya giyakatyachrokaka. <sup>24</sup> Giyagni wa gixolune yine geta gi wa Gesoko wanetka, gi wa yimakleneko. Wane retinitkana gixolune yine, kanawa ruptekatkana. Kapernawo yatkana. Wane rujgiyatkaluna Geso.

*Galikakpotunanu tengogne giyakatyachri jimapro*

<sup>25</sup> Tsrú wenu wakanute rukshikinitkaluna, wane chinruna, “Rawi, ¿Giklu papokatka gewi?”

<sup>26</sup> Rugitna Geso. Wane china, “Galikakni, galikakni wane nchingi, gi wa gijgano getkalurkaka getinri chinanu, seyni wa jimapro gnikinri ga wa jinangi gixinri chinanu gijgano.

<sup>27</sup> Gkamrurewatanu gi wa niikaluru gamgachri chinanu, seyni wa waneyapgi gwagogenenatachri giwekinri mnikawnakatupa niikaluru chinanu gkamrurewatanu. Walenwa Gita Yineru Wgenno genekangi. Gi rixanu Girchi, Goyakaluko gimaxikoletno Gita.”

<sup>28</sup> Giyagni wane chinruna, “¿Klu wkamrutanu wa Goyakalu kamrure wkamruretinja?”

<sup>29</sup> Rugita Geso. Wane chinna, “Tyenwa Goyakalu kamrure, wa gixa galixyaplu Wale yokanatanu.”

<sup>30</sup> Giyagni wane chinruna, “¿Klu getkaluru koxa pkamruta Pixa wa wetyaplu, wa walixyapyi? ¿Klu

pkamruta? <sup>31</sup> Wutsrukatenni niklo mana yineru mwiyawakanuya, yonchi chinyawaka: *Jimapro tengogne giyakatyachro roglutna.*”

<sup>32</sup> Wane chinna Geso, “Galikakni, galikakni wane nchingi, gi wa Moysisi genekgi wa tengogne giyakatyachro jimapro, seyni Nuru genekgi wa galikakpotunanu tengogne giyakatyachri jimapro. <sup>33</sup> Gi rixanu Goyakalu jimapre Walenwa tengogne gijrukyachri, tye psolchijne gajeneko genekgiwekletachri.”

<sup>34</sup> Giyagni wane chinruna, “Gitsrukaachi, penekjetanwu tye jimapro.”

### *Geso, wa jimapro giwekikaluru*

<sup>35</sup> Wane chinna Geso, “Gitni wa jimapro giwekikalurno. Nunyegitjeru gi pagogneko nachiplu. Nalixjerupa gi pagogneko ronunnagatewatanu. <sup>36</sup> Seyni wane nchingi gixa, getmakno. Gi galixa. <sup>37</sup> Pejnuruneko Girchi genekyano ginyegitanno. Wa nunyegitjeru gi wa maleka nuknoklu. <sup>38</sup> Gi rixanu tengogne gijrukyachrino gi wa Gitako nushinikanru nkamrutinripa, seyni wa nyokanatjeru gishinikanru. <sup>39</sup> Tyenwa nyokanatjeru Girchi gishinikanru, wa pejnuruneko renekano gi satuna gamganu, seyni nyotunkakanru ralipregognepatka. <sup>40</sup> Gi rixanu tyenwa nyokanatjeru gishinikanru, wa pejnuruneko Gituru getachine, Wale galixachine waneyapna ruwekinrina gike rixiniko mnikawnakatu. Gita yotunkakanna ralipregognepatka.”

### *Kegemgana Goteyone Geso chinanu*

41 Giyagni Goteyone kegemgayegitlu wane chinre chinanu, “Gitni jimaprono tengogne gijrukyachrino.”

42 Wane chinna, “¿Gi ge Gesokni wa tye, wa Gosi wgene, wa ruru, ga wa runro wumatna? ¿Girixkoxge wane china wa Tye, ‘Tengogne gijrukyachrino?’ ”

43 Geso gigita. Wane chinna, “Gi gkegemganu Gitaya gixkakluko. 44 Gi satuna gimkata ginyegletno Gita wa Girchi nyokanatjeru ma kose-tanutu. Gita yotunkakanru ralipregognepatka.

45 “Yonatkalurni tokanchi geneklewatachine kirukateya: *Goyakalu yimakanna pejnuruneko*. Wa pejnuruneko Girchi yijnakotachine, yimaakalune runyegitnona. 46 Gi wa satu getyalu chinanru Girchi, seyni Gitapje Goyakalu yegi giyakatyachrino netlu Girchi. 47 Galikakni, galikakni wane nchingi, nalixjeru wale waneya ruwekinri gike rixiniko mnikawnakatu. 48 Gitni wa jimapro giwekikalurno. 49 Gitsrukatenni niklo mana yineru mwiyawakanuya, ga wa rupnanatkana. 50 Gitni wa jimapro tengogne gijrukyachrino, wa tye nikachripa ma mupninitipa. 51 Gitni wa jimapro giwekachrino, tengogne gijrukyachrino. Girukokta nikiplu tye jimapro ruwekgoggenatanu. Wa jimapro Gita geneklepa walenwa nogitu neneklepa ruwekinripna psolchijne gajene.”

### *Gesogitu ga wa gigraga*

52 Giyagni Goteyone gejnugimyegkaka. Wane chinna, “¿Girixpoko genekletanwu Tye gigitu wnikyaplu?”

53 Wane chinna Geso, “Galikakni, galikakni wane nchingi, gma niikanuplu nogitu, Gita Yineru Wgenno ga wa gma muragragatkanuplu nograga, maleshayapgi giwekinri gixa gwachri. 54 Wa nnikgitutjeru, nuragragatjeru waneylu ruwekinri gike rixiniko mnikawnakatu. Gita yotunkakanru ralipregognepatka. 55 Gi rixanu nogitni wa galikakpotunanu niikalurni, ga wa nograga galikakpotunanu girkalurni. 56 Wa nnikgitutjeru, ga wa nuragragatjeru Gita rawa. Wale Gita gwa. 57 Wane rixa yokanretno Girchi giwekachri, ga wa Girchi chinanu nuweka, waneko pixka rixa wa nnikjeru. Wale koxa giwekanu Gita chinanu. 58 Tyenwa jimapro tengogne gijrukyachri. Gi wa gitsrukatenni pixka rixa, wa mana nikna. Wa gipnachenenatkani. Wa tye jimapro nikachri giwekgognenatanu gike rixiniko mnikawnakatu.”

59 Tyekaka wane china ginkaklewwakapjiya, Kapernawo Pokchi runkaklewanatya.

### *Wa Giwekikaluru Walenwa geneka giweklere-watachri*

60 Wa gixo yimaklene yijnakonatinri, wane chinna, “Kginmlu tye tokanchi. ¿Katu ginkata yijnakletlu?”

61 Wa rumatini Geso Walenanuko wa yimaklene kegemginri tye tokanchi chinanu, wane chinna Wale, “¿Tyerge gitspeekakgi? 62 ¿Gi gixpokotanu wa getinipno Gita Yineru Wgenno teno nyinipa muchinanu nwanatyawaka? 63 Wa Giwekikaluru Walenwa geneka giweklerewatachri. Wa manchi gike gaprini. Wa tokanchikaka Gita ginkakyagi,

walenwa giwekikaluru ga wa giweklu. <sup>64</sup> Seyni wanena pimrine gixate wa malixkane.”

Gi rixanu Geso gimata yinuwakokoluyakawa ginnaktanwa malixkane, katupni wa samyokjerupa. <sup>65</sup> Wane china, “Wale chinanu wane nchingi, gi satuna gimkata ginreta Gita yegi ma muchichkanru Girchi.”

### *Tokanchi giweklu mnikawnakatupirana*

<sup>66</sup> Wanepnute gixo yimaklene satkapa. Gi wa Waleyma yanatkana.

<sup>67</sup> Giyagni wane chinna Geso wa pamole gepi, “¿Gi ge galuka yaleta gixa?”

<sup>68</sup> Simo Petro gigitlu, “Gitsrukaachi, ¿katyegmaka gayanu? Pixa waneya tokanchi giweklu mnikawnakatupirana. <sup>69</sup> Wixa galixa. Wumatyi wa Kristoyi pixinri, Goyakalu giwekachri Wgenyi.”

<sup>70</sup> Geso gigitlu, “¿Gi ge ntsomitgi gixa wa pamole gepirungi? Ga wa gixa satu kamchini.” <sup>71</sup> Gota Giskaryote wa Simo wgenepiranni wane china, gi rixanu walepni wa samyokjerupa. Walenwa pamole gepirune rixinrina.

## 7

### *Ma malixlena Geso gepurune*

<sup>1</sup> Wa wanepnute Kalile yapanata Geso. Gote gi raluka yapleta, gi rixanu Goteyone galuka giylaletlu. <sup>2</sup> Gi gowukatkalu Goteyone meyi-watinrigogne, wa Gimajechrigogne. <sup>3</sup> Repurune wane chinru, “Pyanutka gewiya. Gote pyanutka. Wa pyimaklene koxa getyaplu pkamrujetanru. <sup>4</sup> Girukokta galuka kpogiru gixleta gi yogimatlu kamrure. Tyekaka pkamrutinri, pupgujetinwa

psolchijne gajeneko yegi.” <sup>5</sup> Gi rixanu gi wa repuruneko galixlu.

<sup>6</sup> Giyagni wane chinna Geso, “Nopapko gi wa rapokawa. Seyni waneygognenangi wa gipapko.

<sup>7</sup> Tye psolchijne gajeneko gi gimkata gayegixletgi gixa. Seyni Gita rayegixna. Gi rixanu Gita gipgujatna wanna wa mugletu kamruretina. <sup>8</sup> Gixa kanikanu tye meyiwluyegi. Gichi nkanikanu Gita tye meyiwluyegi. Gi rixanu gi wa poyagkaakawa nopapko.”

<sup>9</sup> Wane chininitkana, Kalile rutukatka.

### *Gimajechrigogne meyiwluyeglu Geso*

<sup>10</sup> Wa meyiwluyegi kanikinitkana repurune, gowukshini kanikatka Geso koxa. Gi wa gipgujewnachri, seyni pochkeru pixkako. <sup>11</sup> Giyagni rugaluna Goteyone meyiwluyegiya. Wane chinna, “¿Ginaklu wa Wale?” <sup>12</sup> Tsrux gixaxkaklu rixna gixolune yine Gesoya. Wa pimrine wane china, “Kiglerni.”

Pimrine wane china, “Gike. Seyni Wale yokwitna yine.”

<sup>13</sup> Seyni gi satuna pgujetanwaka yanumsayegitlu Goteyone piklena chinanu.

### *Kpashiwakapji runkaklewatya Geso*

<sup>14</sup> Ganikaji meyiwluyegi kanika Geso. Kpashiwakapji ya. Wane runkaklewatya. <sup>15</sup> Giyagni ruglajitna Goteyone. Wane chinna, “¿Gi rixpoko gimatletlu wa Tye wa yonchi? Gi wa yimaakalurni.”

<sup>16</sup> Geso gigitna. Wane china, “Nunkaklewle gi wa Gitanukni, seyni wa nyokanatjerunni.

<sup>17</sup> Girukta galuka kamruretlu nyokanatjeru

gishinikanru rumatanru nunkaklewlepirana, Goyalalunrege waka Gitako ntokanra. <sup>18</sup> Waleko tokanu ginkakletachri, waleko rumalwutikolu rujga. Seyni wa yokanatjeru gimalwutikolu gijgachri, walenwa galikakpotunanu. Maleshaylu wale mpoyagkaknuchi. <sup>19</sup> ¿Gi ge Tokanchi Yokanatkalluru reneki Moysisi, ga wa gixa gi satuna kamrutlu Tokanchi Yokanatkalluru? ¿Kluneru chinanu galuka giylaletno?”

<sup>20</sup> Yine gigitna. Wane chinna, “Kamchi waneyyi. ¿Katu galuka giylaletyi?”

<sup>21</sup> Geso gigitna. Wane chinna, “Satu kamrurchi nkamruta. Wa pejnuruneki gixa gijlajita. <sup>22</sup> Galikakni Moysisi geneki wa sajruku gistaklewlu (seyne gi wa Moysisi runya, seyni wa gitsrukaachinni runya) ga wa gapnanutikalurgogne gixa sajruka gistakletlu jeji. <sup>23</sup> Wa gapnanutikalurgogne sajruka gistakikolupa jeji wa Tokanchi Yokanatkalluru Moysisinu ma kaspukikotupa, ¿gimtuwnayegitnoge gixa wa gapnanutikalurgogne nutuukakpotutyalu satu jeji? <sup>24</sup> Gi gitakyagoklewatanu rixa getletikwaka chinanu, seyni wanepotuko gitakyagoklewatanu.”

### *¿Gi ge Walekni Kristo?*

<sup>25</sup> Giyagni wane chinna pimrine Gerosale gajene, “¿Gi ge Walekni wa Tye wa raluka giylaletanruna? <sup>26</sup> Getanu. Gipgujewnachri yanumsata. Gike chinruna. ¿Rumatatkaluna xani galikakpotunanu tsrukakalune wa Kristo rixinri? <sup>27</sup> Seyni wa Tye wumatlu ginaka giyakatyachrini.

Seyni wa Kristo gininipa gike gimata ginakakta ruyakatini.”

<sup>28</sup> Giyagni kpashiwakaaji runkaglewanatini Geso, saplewata. Wane china, “Gimatno Gita. Ginaka giyakatyachrino gimata. Gi wa Gitako nushinikanu nuna. Seyni wa nyokanatjeru galikakpotunanni Wale, wa gixa mumatanutu. <sup>29</sup> Gita gimatlu, gi rixanu Walenno. Ga wa Wale yokanatno.”

<sup>30</sup> Giyagni raluka kashretluna, seyni gi satuna gomyokyegitlu gi rixanu gi wa gipapko gapokawa. <sup>31</sup> Gixo Wale galixachine wane gixolunetskala. Wane chinna, “¿Wa Kristo gininipa, getkalurkakapa wa Tye kamrutanrupnutlege kamrutanu Wale? Gike.”

*Gwariseyonetowrene  
kashichyapluna Geso*

*yokanatka*

<sup>32</sup> Wa Gwariseyone yijnakotna gixolune yine kegemgiyawakna Walepirankakako. Tsrukakalune sasertotene ga wa Gwariseyone yokanatna gitowrenna wa kashichyapluna.

<sup>33</sup> Geso wane china, “Pshinitsonuchi numwamtangichi. Nyokanatjeru yegi nyanutka. <sup>34</sup> Gijganmakno. Gi gikshikanutkano. Wa nwiyawakapa gixa gi gimkata yaletanu.”

<sup>35</sup> Giyagni wa Goteyone wane chinkaka wanakakluko, “¿Ginaka rushinika yaletge wa Tye wma mukshikyanpatkalu? ¿Rushinika yaletge gitspalatachine, Kriykonetskala gwachine yegi, runkaglewyegityapna Kriykone? <sup>36</sup> ¿Klupiranni wa tye wa Wale wane china? Wa, ‘Gijganmakno.

Gi gikshikanutkano. Wa nwiyawakapa gixa gi ginkata yaletanu.’ ”

*Gonu giwেকachri yapgatyawaka pixka*

<sup>37</sup> Ralipregogne, tsru meyiwlugogne potu, Geso tunwata. Saplewata. Wane china, “Girukokta gonunnagatewata runyegitanno. Ruranu. <sup>38</sup> Yonchi chinyawaka, Gonu giwেকachri yapgatyawaka pixka rixa gishpakletanu ginanwakaya nalixjeru.” <sup>39</sup> Giwекikalurupiranni china wa tye tokanchi, wa ralixjenepa yoptotanrupni Wale. Gi rixanu gi rapyegitawana Giwекikaluru Kpashiri, gi rixanu Geso gi wa royakawatyawaka jiglokawa.

*Gixolune kotspalanshinikankaaka*

<sup>40</sup> Giyagni gixolune yijnakotinri tyepirana, pimrine wane china, “Galikakpotunanni Tyenwa tokanchi geneklewatachri.”

<sup>41</sup> Pimrine wane china, “Kristokni wa Tye.”

Pimrine wane china, “¿Kalilege ruyakatini Kristo? Gike. <sup>42</sup> ¿Gi ge wanekni china yonchi wa Tawiklopisha, Wetle Pokchirge, Tawi gwanatyawaka, wane ruyakatinripa Kristo?”

<sup>43</sup> Giyagni wannakakluko kotspalanshinikankakna gixolune Geso chinanuya. <sup>44</sup> Wa pimrine galuka kashretlu, seyni gikena gomyokyegitlu.

*Gi pagogneko Wale pixka rixa ginkakleta satu yineru tye jeji pixka*

<sup>45</sup> Giyagni towrechine gapyegitna tsrukakalune sasertotene ga wa Gwariseyone. Wane chinkana towrechine, “¿Klu chinanu gi ganiklu?”

<sup>46</sup> Wa towrechine gigitna, “Gi pagogneko Wale pixka rixa ginkakleta satu yineru tye jeji pixka.”

<sup>47</sup> Giyagni wa Gwariseyone gigitna. Wane chinkana, “¿Gixkoxnirge yokwitkanatka?

<sup>48</sup> ¿Ralixluge satu tsrukakalu, ga wa satu Gwariseyo? Gi ralixluna. <sup>49</sup> Seyni wa nyi gixolune, Tokanchi Yokanatkaluru mumatkane, kamakpiratkalunni.”

<sup>50</sup> Wane chinna Nikotemo (Goyechno yayentaperu. Walenwa Gwariseyone satute). <sup>51</sup> “Tokanchi Yokanatkaluru wixanu gi giklukanuwnayegixlu yineru ma muchinanu jempiranyegitkanuwalu, rumatikolupa wale kamrutanru.”

<sup>52</sup> Rugitluna Nikotema. Wane chinruna, “¿Kalile gajerkoxlayge pixa? Petjetanru. Pumatanru. Gi pagogneko Kalile rupgujewnini tokanchi geneklewatachri.”

<sup>53</sup> Satkaka gipji yatka.

## 8

### *Gimopatlewatachro*

<sup>1</sup> Wa Geso Goliwa Magkate yatka.

<sup>2</sup> Goyechnokawpotuko kphasiwakapji yatnaka Geso. Pejnuruneko yine ginyegitlu. Tuplata Geso. Runkaklewyegitna.

<sup>3</sup> Wa yonchikgapine ga wa Gwariseyone ganiklo sato suxo Wale yegi. Tkashichka tumopatlewanatyawakaya. Ganikaji rutaklona.

<sup>4</sup> Wane chinruna, “Yimaklewatachri, twu suxo kashichka tumopatlewanatyawakpotukoya. <sup>5</sup> Wa Tokanchi Yokanatkaluruya, Moysisi towutwu

sotlujetikolupna wane gixachrone. Ga wa Pixa, ¿gi pchina Pixa?”

<sup>6</sup> Wane chinna yantaletyaluna rumkata jigye-gletyapluna. Geso yonogimta. Chiji yonawata gimyojiya. <sup>7</sup> Romkaga gepomsaletinitkaluna, potukawata. Wane chinna, “Girukokta gixa satu mmukochiretu, wale gapka ginkaganro sotluya.”

<sup>8</sup> Rumepe yonogletatnaka. Chiji yonawatatnaka.

<sup>9</sup> Wa yijnakotinitkana, yatkana. Satkaka yananumta. Muchinanu tsrutsoleji potu ga wa gapkatatachripotunanuko. Gesopje giknokamtkatka, ga wa suxo ganikaji gwanatachro. <sup>10</sup> Potukawatatnaka Geso. Gi satuna retatka. Suxopjetkani. Wane chinro, “Suxo, ¿ginakatkana pjigyegitjene? ¿Gikena giklukanuwnayegjixyi?”

<sup>11</sup> Wala wane china, “Gi satuna, Gitsrukaachi.”

Geso wane chinro, “Gi Gitako giklukanuwnayegjixyi. Pyanutka. Gi wanepnuteko pmukochirewatanutka.”

*Gesni wa tye psolchijne gajeneko pokamlatyegitachri*

<sup>12</sup> Wa Geso yanumyegitatnakna. Wane china, “Gitni tye psolchijne gajeneko pokamlatyegitachri. Wa nomkagitjeru gi wa mapshagwaka yananu, seyni waneyaplu pokamlalu giweekaklewatachri.”

<sup>13</sup> Giyagni Gwariseyone wane chinru, “Pixnanuko gipgujtatnawa. Wa pupgujtalewle gi wa galikakpotunanni.”

<sup>14</sup> Rugita Geso. Wane chinna, “Gitnanukmaka gipgujtatnawa. Nupgujtalewle galikakpotunanni.

Gi rixanu numata Gita ginaka nuyakatyga wa ginaka nyanu. Wa gixa gi gimata ginaka nuyakatyga wa ginaka nyanu. <sup>15</sup> Wa gixa giklukanuwnajixlewata rixpokmanetyawaka. Gita gi satuna nuklukanuwnayegjixa. <sup>16</sup> Gita giklukanuwnajixlewatini nuklukanuwnajixlewlé galikakpotunanni, gi rixanu gi wa Gitapjeni, seyni Gita ga wa nyokanateru, Girchi. <sup>17</sup> Wa Tokanchi Yokanatkaluru gixanu wane yonatika: Gepi jéjine gipgujtalewlé galikakpotunanni. <sup>18</sup> Gitni wa Gitnanuko gipgujtatnachriwano, ga wa nyokanateru Girchi gipgujtatno Gita.”

<sup>19</sup> Wane chinruna, “¿Ginaklu Puru?”

Geso gígita, “Gi gimatno Gita, gi wa Nuruko. Gitamka gimatanu, Nurkoxmaka gimatanu.”

<sup>20</sup> Tye tokanchikaka wane chinya Geso sroschi gignantakikwaka, kphasiwakapji runkaklewatini. Gi satuna kashichlu gi rixanu gi wa gipapko gapokawa.

*Nyiyawakapa Gita gixa gi gimkata wane yaletanu*

<sup>21</sup> Giyagni rumepe wane chinretatnakna Geso, “Nyanutka. Gijganmakno, seyni gixapni gmukochire gimupnanuna. Nyiyawakapa Gita gixa gi gimkata wane yaletanu.”

<sup>22</sup> Giyagni wane chinna Goteyone, “¿Walenanuklege giylatinwa? Giyagoka gonra wane china, ‘Nyiyawakapa Gita, gixa gi gimkata wane yaletanu.’ ”

<sup>23</sup> Wane chinna Geso, “Gi wa teno gajengi gixa. Gitni wa teno gajerno. Gixni wa tyechijne gajengi. Gi wa tyechijne gajerno Gita. <sup>24</sup> Giyagni wane nchingi wa gmukochire gimupnanuna. Gi rixanu,

gma malixkanupmakno Gita nixinri gmukochire gimupnanuna.”

<sup>25</sup> Giyagni wane chinruna, “¿Gi gixachriyi Pixa?”

Wane chinna Geso, “Wa muchinanu nunkakyagi. <sup>26</sup> Waneyno gi gepika nunkakletpiranatyapgi, nuklukanuwnayegjixapgi, seyini wa nyokanatjeru galikakpotunanni. Wa Waleya nyijnakotinri Gita, wale nunkakleta tyechijneya.”

<sup>27</sup> Wa Girchipirana runkakyana. Gi rumata jemluna <sup>28</sup> Giyagni Geso wane chinna, “Wa gixa yotukinpatkano Gita wa Yineru Wgenno, waneklu gimatanutkano wa Gita nixinri, ga wa gike nkamruta Gitnanuko, seyini wa Girchi yegi numatinri wale nunkakleta. <sup>29</sup> Gitaymalu wa nyokanatjeru. Gi rutspaltapyano Gitapje nixinri Girchi. Gi rixanu Gita kamrujetlu rugleretjetyawaka.” <sup>30</sup> Tyepirana runkakletini, gixo galixlu Wale.

### *Galikakpotunanu tokanchi koshpakangi*

<sup>31</sup> Giyagni wane chinna Goteyone ralixjenetka, “Wa ntokanu gomkayegitini, galikakpotunanu nyimaklenepgi. <sup>32</sup> Gixa gimatanru galikakpotunanu tokanchi. Galikakpotunanu tokanchi koshpakangi wayegrechine gma mixinitipa.”

<sup>33</sup> Rugitluna, “Gawraklopishanwu wixa. Gike wayegrenenanwu, gi pagogneko. ¿Gi pchinkoxge Pixa, ‘Gishpakachinepgi?’ ”

<sup>34</sup> Rugitna Geso, “Galikakni, galikakni, wane nchingi, wa pejnuruneko mukochri kamrutachine, mukochri wayegrenni. <sup>35</sup> Wa wayegrechri gi wa panchi rawgognenatanu. Wgenchi gwagognenatanru. <sup>36</sup> Giyagni

wa Gituru koshpakinipgi, galikakpotunanu gishpakachinepgi. <sup>37</sup> Numatgi Gawraklopishangi gixinri, seyni galuka giylaletno, gi rixanu wa ntokanu gi wa gwagi. <sup>38</sup> Gita ginkakletlu wa Girchistsi netinri, ga wa gixa kamrutlu wa girustsi gjeminri.”

### *Kamchi girutachingi*

<sup>39</sup> Rugitluna. Wane chinruna, “Wurni Gawrani.”

Wane chinna Geso, “Gawra wgenengi gixkamka, Gawra kamrujetanrumka gkamrutanu. <sup>40</sup> Ga wa xani galuka giylaletno, jeji tokanchi galikakpotunanu ginkakjerno. Wale tokanchi Goyakalu yegi njeminri. Gi wale kamruta Gawra. <sup>41</sup> Gixa kamrutlu girni kamrure.”

Wane chinruna, “Wixa gi wa gapoklewlu chinanu wushpakya. Pagirupje waneywu. Walenwa Goyakalu.”

<sup>42</sup> Wane chinna Geso, “Wa Goyakalu girutkamka, galukanmakno galikaka. Gi rixanu Goyakalu yegi nuyakaty Gita. Gewi napoka. Gi rixanu koxa gi wa Gitako nushinikanu nuna, seyni Wale yokanatno. <sup>43</sup> ;Klu chinanu gi gimata jemlu nunkakletjetanru? Gi rixanu gi gimkata yijnakletlu ntokanu.

### *Gixni wa giru giyakatyachingi*

<sup>44</sup> “Gixni wa giru giyakatyachingi. Walenwa tsru kamchi. Giru getsotanrewle galuka kamrureta. Reyinuwakleyakawa kgiylale-waklerni wale. Galikakpotunanu tokanchiya mwakatni wale. Gi rixanu maleshaylu wale galikakpotunanu. Rayroklewatini, waleko

rushinikanu china, gi rixanu kayroklerni. Gayroklu girni. <sup>45</sup> Gixa gi galixno, gi rixanu Gita galikakpotunanu nchina. <sup>46</sup> ¿Katu wa gixa gimkata gekakgi giklukanuwnaletyano wa nmukochirewatinritka? Galikakpotunanu nchinini, ¿klu chinanu gi galixno? <sup>47</sup> Goyakalu yegi giyakatyachri yijnakotlu Goyakalu tokanu. Giyagni gi gyijnakotlu gixa, gi rixanu gi wa Goyakalu yegi giyakatyachingi.”

*Gawrani mwakanuwa, Gitni*

<sup>48</sup> Rugitluna Goteyone. Wane chinruna, “¿Gi ge wanepotuko wchina wixa, wa Pixni wa Samari gajeryi, ga wa waneyyi kamchi?”

<sup>49</sup> Rugita Geso, “Maleshayno kamchi, seyni nkagwakpiratlu Nuru, ga wa gixa mkagwakpiratkotu gixno. <sup>50</sup> Gi wa nujgalu numalwutikolupa. Waneru wa nujga gimalwuretjeru. Waneru kgi-takyagoklewakleru. <sup>51</sup> Galikakni, galikakni wane nchingi, ntokanu gomkagitachri gike rixiniko retanru gipukchi.”

<sup>52</sup> Wane chinruna Goteyone, “Xawakni wu-matanatkayi waneyyi kamchi. Gawrani gipnana ga wa tokanchi geneklewatachinni. Ga wa Pixa wane china, ‘Wa ntokanu gimretachri gike rixiniko retumganru gipukchi.’ <sup>53</sup> ¿Pixlege wa wut-srukatni Gawrani pnutepegutyi? Wale gipnachri-natka. Ga wa tokanchi geneklewatachinni gipnana. ¿Katu pixnawa Pixnanuko?”

<sup>54</sup> Rugita Geso, “Gitnanuko gimalwutinwa, gike gaprini numalwure. Nuru genekno numalwutikolupa. Walenwa wa gixa Goyakalute nchinanru. <sup>55</sup> Gixa gi gimatlu, ga wa Gita gimatlu. Gi

numatlu, nchinanmaka Gita, gixa pixkamka nix-anu kayroklerupmakno. Seyni numatlu. Numretatokanutlu. <sup>56</sup> Gawrani gitsrukadni rumuwatni retgognetinno nogogne. Retlu ga wa rumuwatni.”

<sup>57</sup> Giyagni wane chinruna Goteyone, “Gi pamyomole walapuunawayi. ¿Petnirge Gawrani?”

<sup>58</sup> Wane chinna Geso, “Galikakni, galikakni wane nchingi, Gawrani mwakanuwa, nwatka Gita.”

<sup>59</sup> Giyagni koscheksotletna sotlujetyapluna. Wa Geso yogimata. Kpashiwakapji rushpakamtya.

## 9

*Jeji rushpakiniyakawa maygaletu rutuukaka Geso*

<sup>1</sup> Wane yapamtini Geso retlu satu jeji rushpakiniyakawa maygaletu. <sup>2</sup> Yimaklene gepomgalu. Wane chinruna, “Rawi, ¿katu mukochirewata, waleko waka rurune, wa maygaletu rushpakinriya?”

<sup>3</sup> Rugita Geso, “Gi tyeko mukochirewata, gi wa ruruneko, seyni wa Goyakalu kamrure gipgujewninripa waleya. <sup>4</sup> Numkata kamrurewleta wa nyokanatjeru kamrurkaka gogikopshini. Goyechno gina. Waneklu gikeko gimkata kamrurewleta. <sup>5</sup> Tyechijne nwakopshini, tye psolchijneko pokamlatachrino.”

<sup>6</sup> Wane chininitka, chiji rutskagata. Rugakajpatlu gitskagaya. Maygaletuygale sagajpatlu kajpa. <sup>7</sup> Wane chinru, “Gajewa. Kawjetikwaka Silowega perkapinwa.” Silowe walenwa yokaakaluru, Yokanatkaluru. Giyagni wane ya. Rerkinawa. Getachri ginatka.

8 Giyagni wa rumwastsitanune, ga wa muchikawa retanatjene wa maygaletu rixanatini, wane chinna, “¿Gi ge walekni wa tye, wa tuplajenatachri gagjijenatachri?”

9 Pimrine wane china, “Walekni.”

Ga wa pimrine wane china, “Gike, seyni wale pixka rixa.”

Waleko wane china, “Gitakni.”

10 Giyagni wane chinruna, “¿Gi pixpoko gimrekgaletatka?”

11 Rugita wale. Wane china, “Wa jeji Geso gi-wakatletachri, kamrujpatlu kajpa. Sagaygaletno. Wane chinno, ‘Gajewa. Silowega perkapinwa.’ Wane nya. Nerkinawa. Netatka.”

12 Wane chinruna, “¿Ginaklu Wale?”

Wale wane china, “Goo. Gi numata.”

### *Gwariseyone gepomgalu maygaletunanu*

13 Gwariseyone yegi ranikluna maygaletunanu.

14 Gapnanutikalurgognenwa Geso kamrujpatlu kajpa, rumrekgakakatkalu. 15 Giyagni rumepe gepomgaletatnagluna Gwariseyone gi rixpoko getletatka. Wale wane chinna, “Kajpa sagaygaletno. Nerkinawa. Netatka.”

16 Giyagni pimrine Gwariseyone wane china, “Tye jeji gi wa Goyakalu yegi giyakatyachrini, gi rixanu gi wa gapnanutikalurgogne rapnanuta.”

Pimrine wane china, “¿Gi rixpoko gimkata kamruretlu tyekaka getkalurkaka satu jeji kmukochireru?”

Wannakakluko kotspalanshinikankakna.

17 Giyagni rumepe wane chinretatnagluna maygaletu, “Ga wa pixa, ¿gi pchina pixa Waleya, gi rixanu rumrekgakakayi?”

Wale wane china, “Tokanchi geneklewat-achrini.”

*Gwariseyone gepomgalu maygaletunanu giru*

<sup>18</sup> Giyagni gi ralixpiranyegitluna Goteyone wa maygaletu rixanatinri, ga wa retinritka. Gi ralixluna tomginpotunanukna rurune rugletaygaletikolutka. <sup>19</sup> Repomgakna. Wane chinkana, “¿Tyenwa gituru, wa gixa wane chinanru maygaletu gishpakyachri? ¿Ga gi rixpoko getletatka?”

<sup>20</sup> Giyagni rugitna rurune. Wane chinna, “Wumatlu tyenwa wixa wgene wa maygaletu gishpakyachri. <sup>21</sup> Gikta rixpoko getletatka gi wumata. Katukta gimrekgakaklu gi wumata. Geponganru wale. Tsrutkani wale. Walenanuko ginkakletinwa.”

<sup>22</sup> Wane chinna rurune gi rixanu Goteyone pikanna. Gi rixanu Goteyone yijnaakakatkana wa satu gipgujtatinri wa Mesiya rixinri, ruknooko maleka ginkaklewawakapjiya. <sup>23</sup> Giyagni rurune wane china, “Tsrutkani. Geponganru wale.”

*Satupje numata*

<sup>24</sup> Giyagni rumepe tomgaletatnagluna wa jeji maygaletunanu. Wane chinruna, “Pumalwutanru Goyakalu. Wixa gimatlu tye jeji kmukochirerni.”

<sup>25</sup> Giyagni wale gigita. Wane china, “Kmkochireru rixinri, gi numata. Satupje numata, wa maygaletu nixanatinri, xawakni netatka.”

<sup>26</sup> Giyagni rumepe wane chinretatnagluna, “¿Gi rixpokoty? ¿Gi rixpoko gimrekgakakletyi?”

<sup>27</sup> Rugitna, “Nunkakatkagi. Gi wa gjemno. ¿Klu chinanu galuka yijnakletatnaklu? ¿Gixkoxlege galuklu wa yimaklengi gixinripa?”

<sup>28</sup> Yangaluna. Wane chinruna, “Pixni wa yimakleryi, ga wa wixa Moysisi yimaklenwu wixa. <sup>29</sup>Wixa gimata wa Moysisi ruynumsata Goyakalu. Ga wa Tye, gi wumata ginaka runya.”

<sup>30</sup> Rugita wa jeji. Wane chinna, “Galikakni giglajruni wa gixa gi gimatlu ginakakta runya, ga wa rumrekgakakno. <sup>31</sup>Wumata wa Goyakalu gi yijnakotna kmukochirerune, seyni wa satu Goyakalu yonogyegitachri, ga wa Wale gishinikanru kamrutachri, wale yijnakota. <sup>32</sup>Gi pagogneko jempiranyegitka wa satu gimrekgakakyawakatkalu wa maygaletu gishpakyachri. <sup>33</sup>Goyakalu yegi ma muyakatkanumka wa Tye gikemka rumkata kamruretano.”

<sup>34</sup> Rugitluna. Wane chinruna, “Psolpotuyako mukochri gimushpakachriyi, ¿ga wa pixa ginkaklewyegitwu wixa?”

Maleka ruknokluna.

### *Maygalene*

<sup>35</sup> Yijnakota Geso wa maleka ruknokyawakluna. Rukshiklu. Wane chinru, “¿Palixluge wa Goyakalu Wgene?”

<sup>36</sup> Rugita wale. Wane china, “¿Katni Wale, Gitsrukaachi, wa nalixyaplu Wale?”

<sup>37</sup> Wane chinru Geso, “Petatkalu. Walekni giynumsaty.”

<sup>38</sup> Wale wane china, “Nalixa, Gitsrukaachi.” Yoptsojityegitlu.

39 Wane china Geso, “Giklukanuw-nayegjixlewlu chinanu, Gita gina tye psolchijneko, retinripna metkane, ga wa maygalene rixinripna getachine.”

40 Wa pimrine Gwariseyone Wale yegi gwanatachine yijnakotlu Wale. Wane chinruna, “¿Wixkoxlege maygalenwu?”

41 Wane chinna Geso, “Maygalengi gixkamka, gimka kmukochirepgi. Ga wa xani gi rixanu gixa wane china, ‘Weta,’ giyagni gmukochire waneygi.

## 10

*Geso ginkakle: Yapkaklu gowegane prijerepiranaya*

1 “Galikakni, galikakni, wane nchingi, wa gowegane prijere gipgyaptotpotuko mjiglokikatu, seyni pnusretako ratskomtya, walenwa kachowguru. 2 Wa gipgyaptopotuko jiglokyachri, Walenwa gowegane girukotachri. 3 Wale chinanu kotpukgipgyaptoteta wa gipgyapto gajeru. Gowegane yijnaktokanutlu. Rowegatene tomga satkaka tgiwakaya. Koshpakna. 4 Wa pejnuruneko Walenune koshpakinitkana, kosekamtatkana. Gowegane gomkagitlu gi rixanu rumatatokanutluna. 5 Gi wa romkagitanruna pnu gajeru, seyni rasukinrina wale, gi rixanu gowegane gi gimatatokanutna maleka gajene.”

6 Tye yapkaklu tokanchi Geso ginkakna, seyni wanna gi gimata jemlu klunwa wane chinyana.

*Gesni wa kigleru kgirukotaprakleru*

7 Giyagni Geso gimepe wane chinretatnaka, “Galikakni, galikakni wane nchingi, Gitni

wa gowegane gipgyaptotno. <sup>8</sup> Pejnuruneko muchinanu ginachine Gitaya kachowgurunni, seyni wa gowegane gi yijnakotna. <sup>9</sup> Gitni wa gipgyaptono. Gitaya jiglokyachri rognetaako. Jiglokjetanu. Rushpakjetanu. Rukshikjetanru nikyawakapa. <sup>10</sup> Wa kachowguru gina walepje chinanu, chowguwatinripa, ga wa ruylalewatinripa, ga wa nikatlewatinripa. Gita gina waneyna rixinripna ruwekinrina, ga wa ponikowa giwekletinripna.

<sup>11</sup> “Gitni wa kigleru kgirukotapraklerno. Kigleru girukotapratachri ruwekinri rutaka gowegane chinanu. <sup>12</sup> Wa wenutkalurni, wa girukotapratachri migje, kgowegateru migje, retapinri kewetna ginachri, ruknokamtna gowegane. Rasukatka. Kewetna kashichanna. Rakapalatna gowegane. <sup>13</sup> Wa wenutkaluru gasuka gi rixanu wa wenutkalurni. Gike rixluna wa wale wa gowegane.

<sup>14</sup> “Gitni wa kigleru kgirukotapraklerno. Numatna nowegatene. Wa Gitanune gimatno. <sup>15</sup> Waneko pixka rixa gimatletno Gita Girchi, ga wa Gita gimatlu Girchi. Nutaklu nuwekinri gowegane chinanu. <sup>16</sup> Pimrone koxa waneyno gowegane, tye prijere mwakane. Wanna koxa numkata gwapleta. Yijnaktokanutannona. Wanepulu satupje rapatyawakapna gowegane, ga wa satupje girukotapratachri. <sup>17</sup> Giyagni Girchi gishinikno gi rixanu nuwekinri nutaka numepe yoptoletyapatnaklu. <sup>18</sup> Gike konanno nuwekinri, seyni Gitako gitaklu Gitanuko. Nutaaka nutakyaplu. Nutaaka numepe

yoptoletyapatnaklu. Wane rixa yokanretno Nuru.”

### *Kotspalanshinikankaklu Goteyonkakluko*

<sup>19</sup> Wanetnaklu kotspalanshinikankaklu Goteyonkakluko tye tokanchi chinanu. <sup>20</sup> Gixolune wane china, “Kamchi waneylu. Seprolokachrini. ¿Klu chinanu gyijnakotlu?”

<sup>21</sup> Pimrine wane china, “Gi wa kamchichachri tokanni wa tye. ¿Kamchirge gimkata gimreggakakletlu satu maygaletu?”

### *Nowegatene jematokanutno*

<sup>22</sup> Gerosale waneru meyiwlugogne, wa kpashiwakapji gitaakoklungogne. Ginapukluni. <sup>23</sup> Kpashiwakapji yotaljeta Geso, gitamnu Salomonu. <sup>24</sup> Giyagni sajrukluna Goteyone. Wane chinruna, “¿Giklunanu pali kojwakanshinikanretanwu? Wa Kristo pixinipa, punkakanwu pgujetanwaka.”

<sup>25</sup> Rugitna Geso, “Nunkakatkagi. Gi galixa. Wa nkamrurkaka Nuru giwakaya, waleko gipgugtjatno Gita. <sup>26</sup> Seyni gixa gi galixa gi rixanu gi wa nowegatengi. <sup>27</sup> Nowegatene jematokanutno. Gita gimatna. Romkagitnona. <sup>28</sup> Gita genekna ruwekinrina gike rixiniko mnikawnakatu. Gi pagogneko ramganna. Gikena koshripatanna nomyoya. <sup>29</sup> Nuru, nenekjeru, pejnurune pnute tsruni Wale. Gikena gimkata koshripletna Nurumyoya. <sup>30</sup> Gita ga wa Girchi satupjerunwu.”

### *Goteyone galuka sotlujeretlu Geso*

<sup>31</sup> Rumepe koscheksotleretna Goteyone sotlujetyapluna. <sup>32</sup> Rugitna Geso, “Gixo kigleru kamrurchi nekakgitgi Girchiya. ¿Giru kamrurchi tyekaka chinanu nsotlujetanmakno?”

<sup>33</sup> Rugitluna Goteyone, “Wa kigleru kamrurchi chinanu, gi wa wsotlujetyi, seyni wa mupashiregnuchi chinanu wsotlujetanmakyi, gi rixanu Pixa yinerukyi Goyakalu putaknawa.”

<sup>34</sup> Rugitna Geso, “¿Gi ge yonatka wa Tokanchi Yokanatkaluruya gixanu: *Gita wane china, goy-akalungi?*”

<sup>35</sup> “Wane chininna goyakalune wanna Goyakalu tokanu genekikolune, ga wa yonchi gi rumkata kaspukletko, <sup>36</sup> wa Gita Girchi kpushiri gitakanruno, tyechijne yokanatanru, gixa wane china, ‘Mupashiregnuchi pchina,’ gi rixanu wane nchina, ‘Gitni Goyakalu Wgenno.’ <sup>37</sup> Gimka Nuru kamrure nkamrutanu, gi galixanno. <sup>38</sup> Wa nkamrutinri, gimka galixanno Gita, galixanru kamrurchi, gimatyapatkalu, gimatgoggenatinripa wa Girchi gwano Gita, ga wa Gita Girchi nwa.”

<sup>39</sup> Giyagni rumepe galuka kashretmamluna, ga wa Wale gishpakamta wannayegiya.

### *Rumepe Gorta wakanute yaletatnaka Geso*

<sup>40</sup> Rumepe Gorta wakanute yaletatnaka, wa Gwa muchinanu katlewjenatyawaka. Wane rawanata. <sup>41</sup> Gixo yayegitlu. Wane chinna, “Gwa galikakni gi satuko getkaluru kamruta. Seyni Gwa ginkakletjenatanru wa Tye ptowruko galikakni.”

<sup>42</sup> Gixo galixlu waneya.

# 11

## *Lasaro yayixinri*

<sup>1</sup> Yayixana Lasarni, Wetani gajerni, Mariya gwiyawaka pokchi, ga wa tyegwaklo Marta.

<sup>2</sup> Mariya, wa Gitsrukaachi pgamlugalo giyokachro, ga wa tsheyjixitlu tojiwutsaya ga ga walanwa yayixyegwakatachro Lasarni.

<sup>3</sup> Repurone yokanrewata Wale yegi. Wane chinjixluna, “Gitsrukaachi, petanu, wa palukanruni yayixanatka.”

<sup>4</sup> Wa yijnakotinitka Geso wane china, “Tye yayixlu, gi wa gipukchipni seyni rumalwutikolupa Goyakalu, wa Goyakalu Wgene gimalwutikolupa Wale chinanuya.”

## *Lasaro gipnale*

<sup>5</sup> Geso gishinikna Marta, ga wa tepuro, ga wa Lasaro. <sup>6</sup> Giyagni wa jeminitka wa yayixinrinatka, wane rutukawa gepgogne wa rawanatyawaka.

<sup>7</sup> Giyagni wanepnute wane chinna yimaklene, “Gote gayanutnaka.”

<sup>8</sup> Yimaklene wane chinru, “Rawi, tyegognekakniko, raluka sotlujeretanyina Goteyone. ¿Waneklege pyanutnaka?”

<sup>9</sup> Rugita Geso, “Waneylu pagogne pamole gepi gora. Gogi yanini satu, gi wa rutspeta, gi rixanu tyechijne pokamlatachini reta. <sup>10</sup> Wa satu goyecho no yanini rutspeta, gi rixanu maleshlu pokamlalu waleya.”

<sup>11</sup> Rali wane chinretinitka, wane chinna, “Lasarni, walukanru, rapnanutatka. Seyni wane nyanu. Nkomyekapanru.”

<sup>12</sup> Giyagni wane chinruna yimaklene, “Gitsrukaachi, rapnanutini, rutukanu.” <sup>13</sup> Wa Geso wane chinre wale gipnaleyaya. Wa wanna kagwaklu wa rapnanushatinri rumkinriyapirana, china.

<sup>14</sup> Giyagni Geso wane chinatkana pgujetanwaka, “Lasarni gipnanatka. <sup>15</sup> Numuwata gixa chinanu, gi wa wane nwanata, galixinripa. Seyni gayanutka wale yegi.”

<sup>16</sup> Giyagni Tomasu wa Gepirutu chinkaluru wane chinna ruyimakikolune, “Wane koxa gayanu wixa Waleyama wupninripa.”

### *Yotunru ga wa giweklu*

<sup>17</sup> Giyagni rapokinitka Geso, rumatalkalu gepkoxamkojgognetkani kapnatikolutka. <sup>18</sup> Wa Wetani gi gowukayatkalu Gerosale, mapa getko kilometroni. <sup>19</sup> Gixo Goteyone ginyegitlo Marta ga wa Mariya yegwakluniyina rumnankapkana. <sup>20</sup> Giyagni Marta jeminitka Geso gininritka, tyop-totaplu. Ga wa Mariya panchi tuplanata.

<sup>21</sup> Giyagni Marta wane chinru Geso, “Gitsrukaachi, gewi pwanatkamka, gimka rupnanni nyegwakluni. <sup>22</sup> Xani koxa numatlu wa pejnuruko pagjityaplu Goyakalu, Goyakalu genekanyi.”

<sup>23</sup> Wane chinro Geso, “Yotunotanu pyegwaklupa.”

<sup>24</sup> Marta wane chinru, “Numatlu yotunotinripa yotunkoklunchipa ralipregognepa.”

<sup>25</sup> Wane chinro Geso, “Gitni wa yotunru ga wa giweklu. Wa nalixjeru rupnanmaka, ruwekanu.

26 Pejnuruneko giwekachine nalixjene gi pagogneko rupnanna. ¿Gi ge palixlu tye?”

27 Wane chinru, “Gigi, Gitsrukaachi. Nalixatka gita Pixni wa Kristoyi, Goyakalu Wgenyi, tyechine ginachriyi.”

### *Geso chiyagata*

28 Tali wane chinretinitka, talimta. Pochkeroko tomgalo tepuro Mariya. Wane chinro, “Gewitkalu Yimaklewatachri. Repukyi.”

29 Wala jeminitka, giyampotu tpalnamta. Tyayegitlu. 30 Gi wa pokchi rapokawa Geso, seyni wa Marta yoptotapyawakaklu rawanata. 31 Giyagni Goteyone panchi gwanatachine walayma tumnanukanatjene, wa retinitkalona Mariya tunwamtinritka giyampotu, tushpakamtatka, romkagimtlona. Kagwakna wa yomlechi tyinripa wane chiyamtapinripa.

32 Giyagni Mariya tapyegitinitkalu Geso, tetinri, chiji tapokamta gijixistsi. Wane chinru, “Gitsrukaachi, gewi pwanatkamka, gimka rupnanni nyegwawluni.”

33 Giyagni Geso wa retinro chiyagatachro, ga wa walayma ginachine Goteyone chiyaganatachine jigekanuwata ginshinikanuya. Kojwakanshinikanuta. 34 Wane china, “¿Ginaka gitakanru?”

Wane chinruna, “Gitsrukaachi, punanu. Peta-panru.”

35 Chiyagata Geso. 36 Giyagni wane chinna Goteyone, “¡Getanru! ¡Gi pagaluklenanukta rixlu!”

37 Wanna pimrine wane china, “¿Gi ge rumkatlu wa Tye wa maygaletu gimrekgakakachri, gi-tuukakletlu wale ma mupninitipa?”

### *Lasaro yotunkaaka*

<sup>38</sup> Giyagni Geso jige kanuwatnaka Wale-nanuko. Yomlechi yegi rapoka. Gitawakapnani, sotlu gishyatkaluru. <sup>39</sup> Wane china Geso, “Gkoschekanru sotlu.”

Marta, wa gipnachri gepuro wane chinru, “Git-srukaachi posunatkalu, gi rixanu gepkoxamkoj-gognetkani.”

<sup>40</sup> Geso wane chinro, “¿Gi ge wane nchinyi, palixini petanru Goyakalu goyaknu?”

<sup>41</sup> Giyagni koschekluna wa sotlu wa gipnachri gitakikowakaya. Wa Geso teno yigata. Wane china, “Nuru, npoyagnutyi Pixa yijnakotyawa-kno. <sup>42</sup> Numata pyijnakjetno. Seyni gixolune yine chinanu wa sajrukachine, wane nchina, wa ralixinripna Pixa yokanatyano.”

<sup>43</sup> Rali wane chinretinitka, soplewata. Tsrutokanu rixa, “Lasaroo, tekali. Pushpakanu.”

<sup>44</sup> Wa gipnanatachri rushpakatka, gostumyotkaluru, ga wa gijixi mkachrichrataya. Ga wa gigoji sapwakgojitka kasamalu.

Wane chinna Geso, “Gkaspukanru. Getasha yaletanru.”

### *Jemanshinikankakna ruylatyapluna Geso*

<sup>45</sup> Giyagni gixo Goteyone wa Mariya yegi ginachine, ga wa Geso kamrutanru getachine ralixluna Wale. <sup>46</sup> Wa wanna pimrine Gwariseyone yegi ya. Runkaakana wa Geso kamrutanrupirana.

<sup>47</sup> Giyagni wa tsrukakalune sasertotene ga wa Gwariseyone gapatjetna jemanshinikankakjetik-waka gajene. Wane chinna, “¿Gi wixanutka? Gi rixanu wa tye jeji kamrutlu gixo getkalurkaka.

<sup>48</sup> Wetasha wane gixletinri pejnuruneko galix-anru. Runanna Romanone. Konanunwuna gawiywaka ga wa wgirukotlewatyawaka.”

<sup>49</sup> Wa Kaygwasu, satu wannate, wale walapu sasertotene gitsrukate potu rixinri, wane chinna, “Gixa gike gimata. <sup>50</sup> Gi waleko gyanshinikanuta wa rupxakyapwu wa satu jeji gipninripa yine chinanu, ma mamginitipna pejnuruneko yine.”

<sup>51</sup> Gi wa waleko rushinikanu wane china, seyni wa sasertotene gitsrukate potu rixinri wale walapu, tokanchi reneklewata. Wane china wa Geso gipninripatka yine chinanu. <sup>52</sup> Gi wa wannanerupje chinanu, seyni koxa wanerutupje rapatyawakapna Goyakalu wgenene wa gipalanatachine. <sup>53</sup> Giyagni walgogneyakawa jemanshinikankakna ruylatyapluna.

<sup>54</sup> Giyagni Geso gi wane yapatka pgujetanwaka Goteyonetskalaya, seyni wane yiyatka. Yineru mwiyawakanustsi gwachijnetachri ya, satu pokchi Giprayi giwakatletachri. Wane rawanata yimakleneyma.

### *Yokanatkaluru kashichikolupa*

<sup>55</sup> Wa Tsrú Giknoglushgogne Goteyonenu gi gowukatkalu. Walesreta rushpakyana gixo. Gerosale kanikna, Tsrú Giknoglushgogne ma mapookanuwa, kpashirine rutakikolupna.

<sup>56</sup> Giyagni rujgaluna Geso. Kpashiwakapjiya tunwatachine wane chinkakna, “¿Gi pixka getle gixlu? ¿Gi wa meyiwatikwaka runanu?”

<sup>57</sup> Tsrúkalune sasertotene ga wa Gwariseyone yokanrewatna, wa katukokta gimata ginaka rawa, runkaklewatinripa wa kashichyapluna.

## 12

### *Ruyokjixitka Geso Wetaniya*

<sup>1</sup> Giyagni patsrujirgogne magatiniwa Tsru Giknoglushgogne, Wetani rapoka Geso, wa Lasaro gwiywaka, wa gipnapachri wa yotunkakanru gipnachinetskalaya. <sup>2</sup> Giyagni wane ralpokotyaluna nachnewlupa. Marta gitsapapota. Lasaro walenwa ruxiplatjeru nikiwowakaya. <sup>3</sup> Giyagni Mariya wa pgamlugalo ganikaji ginu twapa, nartogapje kwenuru potu. Tuyokjixitlu Geso. Tsheyjixitlu tojiwutsaya. Psolupjiko tyapa pogamlunuta.

<sup>4</sup> Satu yimakleru Gota Giskaryote, Simo wgene, wa samyokjerupa, wane china, <sup>5</sup> “¿Klu chinanu gi tushankaka twu pgamlugalo wa mapa pachaproji chinanu, kwamonurunnimka teneeko?” <sup>6</sup> Gi wa retwamonutya chinanna wa kwamonurune, seyni gi rixanu kachowgurni wale. Sroschimapa ranika. Rawjetlu tsapatkaluru.

<sup>7</sup> Giyagni Geso wane china, “Petashatanro. Nkapnatikolgogne chinanu tumretlo wa twu. <sup>8</sup> Gi rixanu wa kwamonurune gimwagogenata gixa, ga wa Gita gi wa gimwagogenatanu.”

### *Jemanshinikankakyegitluna Lasaro*

<sup>9</sup> Giyagni gixolune Goteyone gimata wa wane rawinri Wale. Gi wa Geso chinanupje runna, seyni Lasaro koxa retapinripna wa yotunkakanru gipnachinetskalaya. <sup>10</sup> Jemanshinikankakna tsrukakalune sasertotene, Lasaro koxa ruylatinripna. <sup>11</sup> Gi rixanu wale chinanu gixo Goteyone wane ya. Ralixluna Geso.

*Gerosale rapokinri gakagloklewatachri*

<sup>12</sup> Waleprikogone gixolune yine gina meyiwlu yegi, gi rixanu yijnakotluna Geso Gerosale yin-ripa. <sup>13</sup> Rawluna kasureru. Yoptotapluna. Saple-watna:

*jPoyagnu!*

*jGiglenshinikanyegitkaluru Gitsrukaachi giwaka giny-achri,*

Gisrayiline Pogire!

<sup>14</sup> Geso gikshiklu mporo. Waletji tuplata. Yonchi chinyawaka:

<sup>15</sup> *Gi pikanu, Siyo nshicho.*

*Petanru. Pogire gina,*

*mporo wgenetji tuplatachri.*

<sup>16</sup> Muchinanu yimaklene gi gimata jemlu tyekakapirana, seyni royaknu jiglokinitka Geso, waneklu rushinkapluna tyekaka yonatkaluru Walepirana, ga wa wane rixluna tyekaka.

<sup>17</sup> Giyagni wa gixolune Wale yegi gwanatachine, wanna gipgujtatlu tomgiyawaklu Lasaro kapnaya. Gipnachinetskalaya yotunkaklu. <sup>18</sup> Wale koxa chinanu yoptotapluna gixolune yine, gi rixanu jempiranyegitluna Wale getkaluru kamrutinri. <sup>19</sup> Giyagni Gwariseyone wannakakluko wane chinkaka, “Getlu. Gikegapri gkamruta. Getanru. Psolchijne gajeneko gwagajxigitlu.”

*“Waluka getletlu Geso”*

<sup>20</sup> Kanikachine meyiwlu yoptsojityentapachinepaymana pimrine Kriyhone. <sup>21</sup> Giyagni wa nyi gapyegitlu Wilipi, Wetsayta, Kalilesreta gajerunanu. Ragjitluna. Wane chinruna, “Wumole, waluka getletlu Geso.”

<sup>22</sup> Wilipi ginkakaplu Gantirishi. Gantirishi ga wa Wilipi ginkaklu Geso. <sup>23</sup> Geso gigitna. Wane china, “Nopapko gapokanu noyaknu njiglokin-ripa Gita, Yineru Wgenno. <sup>24</sup> Galikakni, galikakni wane nchingi, Chiji ma mujrukini trikoji, ma mupnakanu, walepje gituka. Wa rupninina, gixoji rawini. <sup>25</sup> Ruwekinri galukachri, ramginina ruwekinri, ga wa ruwekinri gayegixachri tyechi-jneya, wale gimretanru ruwekinripa gike rixiniko mnikawnakatupa. <sup>26</sup> Satu kamrurewyegitinno, romkagitanno. Ginakpaktano, wane koxa rawanu nkamrurewyegitjeru. Satu kamrurewyegitinno, Nuru gitakanru kagwakpiratikolupa.

*Yineru Wgene gimkata yotunkakletkota*

<sup>27</sup> “Xani nkojwakanshinikanuta. ¿Gi nchinanu? ¿Nuru, pognetkakanno tyepapkoya? Seyni tye chinanukni tyepapko nuna. <sup>28</sup> Nuru, pgiwaka gimalwutikolupa Pixa chinanu.”

Giyagni tengogne ruyakatya tokanchi, “Rumalwutikolutka Gita chinanu. Rumepe gimalwutikolupa Gita chinanupa.”

<sup>29</sup> Giyagni wa gixolune wane gwanatachine, yijnakonatachine, wane chinna, “Rutlogleni.”

Pimrine wane china, “Goyakalutowreru giynumsatlu.”

<sup>30</sup> Rugita Geso. Wane china, “Gi wa Gita chinanni runa tye tokanchi, seyni gixa chinanu. <sup>31</sup> Xani ruklukanuwnayegjixikolna tye psolchijne gajeneko. Xani tye psolchijne gajeneko gitsrukate, Satanasyo, giknookalurupni maleka. <sup>32</sup> Wa yotukinpatkanona chijiya, pejnuruneko nkosetanu Gita

yegi.” <sup>33</sup> Wane china rumatkakyapna gi pixkalutu gipukchi rupninripa.

<sup>34</sup> Giyagni rugitluna gixolune, “Wixa jemlu Tokanchi Yokanatkaluruya wa Kristo gwagognenatanu. ¿Gi pchinkoxge Pixa: ‘Rumkata yotunkaakota Yineru Wgene?’ ¿Gi gixachringe wa tye Yineru Wgene?”

<sup>35</sup> Giyagni Geso wane chinna, “Pshinitsonu gixa yegi rawanu pokamlalu. Pokamlalu waneyakopshingi gyananu, ma kashichkanupgi wa mapshagalalu. Wa mapshagwaka yanachri gi wa rumata ginakakta ya.

### *Goteyone malixle*

<sup>36</sup> “Pokamlalu waneyakopshingi galixanru pokamlalu, wa pokamlalu wgenene gixinripa.” Walekakupirana yanumsata Geso. Ralimta. Yogimatyana.

<sup>37</sup> Gixomka getkaluru kamrugetanutna. Gi ralixluna Wale, <sup>38</sup> poyagkakikolupa wa tokanchi Gisaiya tokanchi geneklewatachri chinyawaka: *Gitsrukaachi, ¿katu galixlu wunkakletanru?*

¿Katu gekakgitka wa Gitsrukaachimyo?

<sup>39</sup> Wale chinanu gi rumkata galixletna, gi rixanu rumepe wane chinretatnaka Gisaiya:

<sup>40</sup> *Maygalene rixkakna.*

*Shikowgajakna.*

*Giygaley na ma metinitipna.*

*Ma mumata jemgajitinipna ma kashrijetikotupna.*

*Nma mutskalakyanyupna.*

<sup>41</sup> Tyekaka chinjeta Gisaiya wa retinri wa royaknu, Walepirana ruynumsatinri.

<sup>42</sup> Wane gixkamka, seyni wa tsrukakaluneko gixo galixlu Wale, seyni wa Gwariseyone chinanu gi wa rupgujatluna, ginkaklewwakapji ma muknokikotupna. <sup>43</sup> Gi rixanu ralukpotutluna yine gimalwure Goyakalu gimalwure pnute.

### *Geso tokanu giklukanuwnakaklewatnri*

<sup>44</sup> Saplewata Geso. Wane china, “Nalixjeru gi Gita ralixa seyni wa nyokanatjeru galikaka. <sup>45</sup> Wa netjeru retkoxlu wa nyokanatjeru. <sup>46</sup> Gitni pokamlalno tye chiji ginachrino wa pejnuruneko nalixjene mapshagwaka mawinitipna.

<sup>47</sup> “Satu jeminri ntokanu, gi wa ralixanru, gi wa Gita giklukanuwnayegjixanru. Gi rixanu gi wa nuna nuklukanuwnayegjixyapna tyechijne gajene, seyni nognetkakyapna tyechijne gajene.

<sup>48</sup> Nuknokjeru, gi wa yoptotokanutno, waneru wa ruklukanuwnayegjixjerupa. Wa tokanchi nunkakletanru, wale giklukanuwnakakanru ralipregognepa. <sup>49</sup> Gi rixanu gi wa Gitako nushinikanu nunkaklewata, seyni wa nyokanatjeru Girchi, Wale yokanatno wane nchinyawakapa, ga wa nunkakletanrupa.

<sup>50</sup> Numatlu Wale yokanatyawaka Walenwa giweklu gike rixiniko mnikawnakatu. Giyagni wa Gita ginkakletanru wa Girchi chinyawakno, wane nchina ginkakleta.”

## 13

### *Geso gerkajixitna yimaklene*

<sup>1</sup> Ma mapookanuwa meyiwlu Tsru Giknoglushgogne, rumata Geso wa gipapko gapokinritka, tyechijne rushpaknripatka, Girchi yegi

yinripatka. Wane rixa gishinikletna Walenune tyechijne gwanatachine, yoptukyawakpotuko rushinikna.

<sup>2</sup> Rali nachinewletinitkana kamchi gajitletkakatkalu Gota, wa Simo Giskaryote wgene, samyokyapatkalu. <sup>3</sup> Rumata Geso wa Girchi genekyalu pejnurkakako, ga wa Goyakalu yegi giyakatyachri, ga wa Goyakalu yegi ya. <sup>4</sup> Palnatka nachnewluyegiya. Komkaga. Sheyipisama rawa. Saprikapchijitnawa. <sup>5</sup> Wanepnute gerkapi rutakgatlu gonu. Yinuwaka gerkajixletna yimaklene. Sheyipisama saprikapchijitanruya sheyityana.

<sup>6</sup> Giyagni Simo Petro yegi runini, Petro wane chinru, “Gitsrukaachi, ¿Pixlege gerkajixitano?”

<sup>7</sup> Rugita Geso. Wane chinru, “Wa Gita kam-rutanru, gi wa xani pumata jemlu. Wa gowukshiniyaka pumata jemanru.”

<sup>8</sup> Wane chinru Petro, “Gike pixiniko perkajixitano.”

Geso gigitlu, “Nma merkakanyi maleshayapyi Gitanuya.”

<sup>9</sup> Wane chinru Simo Petro, “Gitsrukaachi, gi wa nojixipje, seyni nomyo koxa ga wa nojiwu koxa.”

<sup>10</sup> Wane chinru Geso, “Wa gerkakalurutka, gi wa magatatka. Satupjetkalu wa gijixipje gerkako, seyni psoluyako powratka. Ga wa gixa powralungi, seyni gi wa pejnurunekgi.” <sup>11</sup> Gi rixanu rumatlu samyokjerupa. Giyagni wane china, “Gi wa pejnurunekgi powra.”

### *Gymanrupa nekakgitgi*

<sup>12</sup> Giyagni rali gerkajixitletinitkana, wa rawamkatinitka, tuplatatnaka nikipowakaya.

Wane chinna, “¿Gi ge gimatlu wa nixyawakgi?  
<sup>13</sup> Gixa wane chinjetno, ‘Yimaklewatachri ga wa Gitsrukaachi.’ Wanepotuko nchina, gi rixanu Gitakni. <sup>14</sup> Maka Gita wa Gitsrukaachino ga wa Yimaklewatachrino nerkajixitgi, gixa koxa gimkata gerkajixkakleta. <sup>15</sup> Gi rixanu gyimanrupa nekakitgi, gixa koxa kamrutyaplu nkamrutyagi. <sup>16</sup> Galikakni, galikakni wane nchingi, wa wayegrechri gi wa rutsrukate pnute tsruni wale. Wa yokanatkaluru gi wa yokanatjeru pnute tsruni wale. <sup>17</sup> Tyekaka gimatini, giglenshinikanyegitkalunepgi wa wane gixinipa.

<sup>18</sup> “Gi wa pejnurunekgi gixapirana wane nchina. Gita gimatna ginnanwa ntsomitanune, seyini poyagkaakalurupa satu tokanchi yonatkaluru, wane chinachri: *Wa Gitayma jimapro nikachri rumtukno yokwireya.*

<sup>19</sup> “Xanigognenanu nunkakgi ma mapookanuwa, wa rapokinipa galixanno Gita nixinri. <sup>20</sup> Galikakni, galikakni wane nchingi, wa nyokanatanru yoptotachri Gita yoptota. Ga wa Gita yoptotachri nyokanatjeru yoptota.”

*Geso ginkakletlu wa satu yimاكلerni wa samyokjerupa*

<sup>21</sup> Wane chininitka Geso, kojwakanshinikanuta. Rupgujtalewata. Wane china, “Galikakni, galikakni wane nchingi, satu gixa nchininri wale samyokanno.”

<sup>22</sup> Giyagni yimaklene getjekaka. Gi rumatanshinikanutna katupiranni wane china.

<sup>23</sup> Waneru satu yimakleru Geso gishinikanru,

Geso gitspanostatachri. <sup>24</sup> Giyagni Simo Petro gitnoyegitlu tye, wa repomgiyaplu katupiranni wane china. <sup>25</sup> Geso gitspanostatachri wane chinru, “Gitsrukaachi, ¿katni wale?”

<sup>26</sup> Giyagni rugita Geso, “Waleni Gita genekanrupa psoji gigakachri.” Wale gigaklu psoji. Reneklu Gota Giskaryote, wa Simo wgene. <sup>27</sup> Psoji niklokinitka, Satanasyo jiglokatkalu.

Giyagni Geso wane chinru, “Pkamrutanru giyampotu pkamrutanru.”

<sup>28</sup> Gi satuna nikiwakaya tuplanatachine gimata klu chinanu wane chinru. <sup>29</sup> Gi rixanu pimrine kagwaklu wa Gota ktsapane rixinri, Geso wane chinru, “Pagjitanru wa walukanru meywlu chinanu, waka kwamonurune renekanu pagixanu.” <sup>30</sup> Giyagni wale yoptotinitkalu psoji, waneklu rushpakamtatka. Goyechnotkani.

### *Gerotu yokanru*

<sup>31</sup> Giyagni rushpakamtinitka, wane china Geso, “Xanitkani njiglokanutka noyaknu Gita Yineru Wgenno. Ga wa Goyakalu gimalwutikolpatka Gita chinanu. <sup>32</sup> Goyakalu gimalwutikolupa Gita chinanu, Goyakalu chinanu koxa Gita gimalwutikolupa. Xaniyakawa numalwutikolupa Goyakalu chinanu.

<sup>33</sup> “Wiwine, pshinitsonu numwanutkagi. Giganmakno. Wa Goteyone nchinyawaka, wa nyiyawakapa Gita, gixa gi gimkata wane yaletanu. Wane koxa nchingi gixa xani.

<sup>34</sup> “Satu yokanru gerotu nenekgi, wa gishiniikakinripa. Gita gishinikinikopixkagi, waneko pixka gixa gishiniikakletanu. <sup>35</sup> Wale chinanu

pejnuruneko gimatanu gixni wa nyimaklengi, wa gixkakluko gishiniikakinripa.”

*Geso ginkakletagnaputlu Petro nutatinripa*

<sup>36</sup> Simo Petro wane chinru, “Gitsrukaachi, ¿ginaka pyanu?”

Geso gigitlu, “Wa nyiyawakapa Gita gi pumkata gomkagletanno wa xani. Wa gowukshini pomkagitanno.”

<sup>37</sup> Petro wane chinru, “Gitsrukaachi, ¿klu chinanu gi numkata gomkagletanyi wa xani? Pixa chinanu nutakanru nuwekinri.”

<sup>38</sup> Geso gigitlu, “¿Gita chinanu putakanru puwekinri? Galikakni, galikakni, wane nchinyi, ma yanumatkanuwa gaxawripa, mapa kata pnutatanno.

## 14

*Gatnugapo, ga wa tokanchi galikakpotu, ga wa giweklu*

<sup>1</sup> “Gi gkojwakanshinikangajitinwa. Galixlu Goyakalu. Galixankoxno Gita. <sup>2</sup> Nurupji gixo gwikwaka wane. Wane ma mixkanumka, nunkakanmakgi. Giyagni nyanuchi.

Nalpoktapingi gwiyawakapa gixanupa. <sup>3</sup> Nyinpatka, nalpokotiniplu gwikowakapa gixanupa, nunanutnaka. Gitako gwapanutkagi. Nwiyawaka koxa Gita, wane koxa gwanu gixa.

<sup>4</sup> Gimatlu ginaka nyanu. Gimatgapotlu.”

<sup>5</sup> Tomasu wane chinru, “Gitsrukaachi, gi wumata ginaka pyanu. ¿Gi wixpoko gimatletanru wa gatnugapo?”

<sup>6</sup> Geso wane chinru, “Gitni wa gatnugapo, ga wa tokanchi galikakpotu, ga wa giweklu. Gike yayegitlu Girchi, seyni Gitapje chinanu yayegitka Girchi. <sup>7</sup> Gimatinno, Nuru koxa gimatanu. Xaniyakawa gimatlu. Getatkalu.”

### *Pekakgitanwu wa Girchi*

<sup>8</sup> Wilipi wane chinru, “Gitsrukaachi, pekakgitanwu wa Girchi. Poyagota wixa chinanu.”

<sup>9</sup> Geso wane chinru, “Gi pomshiniko numwatkagi, ¿gi ge pumatno, Wilipi? Wa netjeru retkoxlu Girchi. ¿Gi pchinkoxge pixa, ‘Pekakgitanwu Girchi?’ <sup>10</sup> ¿Gi ge palixno wa Gita Girchi nwinri, ga wa Girchi Gita rawa? Wa tokanchi nunkakyagi, gi wa Gitako nonshinikanu wane nchina. Seyni wa Girchi Gita gwachri Wale kamrutlu wa kamrurchikaka. <sup>11</sup> Galixanno Girchi nwinri, ga wa Girchi Gita rawa. Gma wane gixkanupa, galixanno kamrurchiyako.

### *Kamrurchi tyekaka pnute*

<sup>12</sup> “Galikakni, galikakni wane nchingi, wa kamrurchikaka nkamrutanru nalixjeru koxa kamrutanru. Ga wa tyekaka pnute kamrutanu nalixjeru, gi rixanu Girchi yegi nyanu. <sup>13</sup> Klunerukokta gagjitanru Girchi ngiwakaya, wale nkamrutanu, Girchi gimalwutikolupa Gituru chinanu. <sup>14</sup> Klunerukokta gagjitinipa ngiwakaya, Gita kamrutanru.

### *Giwekikaluru Kpashiri gipiratkaluru*

15 “Gishinikinipno gkamrutanru nyokanatanrukaka. 16 Gita gagjitanru Girchi ga wa satu Kgimnanukakleru renekangi, gixa yegi gwagognenat-achripa. 17 Walenwa Giwekikaluru galikakpotunanu. Wale tyechijne gajene gi gimkata yoptoletanru, gi rixanu gi retluna. Gi koxa rumatluna. Gixa gimatlu gi rixanu gixa yegi rawa, ga wa gixa gitokote rawanu.

*Kristo gipgujewninri*

18 “Gi wa murungi nuknokamtanu. Nyayegitangi. 19 Pshinitsonu tyechijne gajene gi getanutkano, ga wa gixa getanno, gi rixanu Gita giweka, ga wa gixa koxa giwekanu. 20 Walegogne gimatanu wa Girchi nwinri, ga wa Gita gwa gixa, ga wa gixa nwa Gita. 21 Nyokanrekaka waneyalutu, ga wa wale kamrutachri, walenwa nushinikjeru. Nushinikjeru Nuru gishinikanrupa. Gita gishinikanru. Nupgujetinwa wale yegi.”

22 Gota gi wa Giskaryotni wale, wane chinru, “Gitsrukaachi, ɔklunerni wa tye wa wixa yegi pupgujetinwa, gi wa tye psolchijne gajeneko yegi?”

23 Geso gigitlu. Wane chinru, “Girukokta gishinikinipno rumretatokanutanno. Nuru gishinikanru wale. Wale yegi gayanu. Wale yineru yegi gawgognenatanu. 24 Nma mushinikjetu gi gimretanru ntokanu. Ga wa tokanchi gyijnakotanru gi wa Gitanni, seyini Girchi wa nyokanatjeru tokanni.

*Giglewanshinikanru nuknokyegimtgi.*

<sup>25</sup> “Tyekaka nunkakgi gixa yegi nwanatini.  
<sup>26</sup> Wa Kginnanukakleru, Giwekikaluru Kpashiri, wa Girchi yokanatanru Gita giwakaya, Wale gimatkakangi pejnurukopirana. Rushiniikakangi pejnurupiranako nunkakyagi.  
<sup>27</sup> Giglewanshinikanru nuknokyegimtgi. Nuglenunshinikanu nenekgi. Gi wa tyechijne gajene genekle pixka, Gita genekyagi. Gi wa gkojwakanshinikanutinwa. Gi wa kpiklegolunepgi.

<sup>28</sup> “Gyijnakotlu wa nunkakyawakgi: ‘Nyanu, ga wa nunanutnaka gixa yegi.’ Gishinikinipno, gimuwatanmaka, gi rixanu wane nchina, Girchi yegi nyanu. Gi rixanu Girchinwa Gita pnute tsru.  
<sup>29</sup> Ga wa xani nunkakatkgi ma mapookanuwa, wa wane rixinpatka galixinripa. <sup>30</sup> Gi wa gixo potu nuynumsatanutkagi, gi rixanu runatka kamchi, tyechijne gitsrukate. Gike waneylu wa Gitya. <sup>31</sup> Seyni rumatinripna tyechijne gajene Girchi nushinikinri, ga wa Girchi yokanatyawakno wane nixa kamrureta.

“Ntunwatanu. Gewi gayinitka.

## 15

### *Geso ginkakna Gowatsa galikakpotupirana*

<sup>1</sup> “Gitni wa gowatsno galikakpotu. Nurni wa kgisanateru. <sup>2</sup> Pejnuruko giplutsa Gita gwachri, gi kajru, Wale konanru. Ga wa pejnuruko kajiru Wale powratanru jiwpotutinripatka. <sup>3</sup> Ga wa gixa powralunetkagi tokanchi chinanu wa nunkakyagi. <sup>4</sup> Gita gwanu gixa. Gixa nwanu

Gita. Wa giplutsa pixka gi rumkata gwaleta wale-nanuko, wa gowatsa mwakatu rixini, waneko pixka gixa, Gita gmawakanu.

<sup>5</sup> “Gitni wa gowatsno. Gixni wa giplutsa. Gita gwachri, wa wale nwini Gita, wale gixoji gwiylu. Gi rixanu Gita mwakatu gike gimkata kamrureta gixa. <sup>6</sup> Girukta gi gwinno, maleka giknookaluru-pa wa giplutsa pixka. Rupriganu. Rawanruna. Xirnachri ruknokanruna, ga wa xirnanu. <sup>7</sup> Gita gwini. Gixa rawini ntokanu, galukanru pejnunanuka gagjitanu. Waneyapgi. <sup>8</sup> Waleya rumalwutika Nuru, wa gixa gixo Wale kamrure gwini. Wane gixinipa nyimaklenepgi.

<sup>9</sup> “Girchi gishinikinikopixkano, wane nixa gishinikletgi. Nushiniklewle gomkagitanu. <sup>10</sup> Gkamrutiniplu nyokanrekaka nushiniklewle gomkagita. Gita pixka Nuru yokanrekaka nkamruta ga wa rushiniklewle nomkagita. <sup>11</sup> Tyepirana nunkakgi, numuwle waneyapgi, ga wa gixa gimuwle tseruwnapotutinripa.

*Geso ginkakna wa gikena waneya rushiniklewle tye pnute tsru*

<sup>12</sup> “Tyenwa nyokanre, wa gishiniikakinripa, Gita gishinikinikopixkagi. <sup>13</sup> Gikena waneya rushiniklewle tye pnute tsru, wa rutakyaplu ruwekinri rumatanune chinanu. <sup>14</sup> Gixni wa numatanungi wa gkamrutinri nyokanatyagi. <sup>15</sup> Gi wa wayegrechine nchinanutkagi, gi rixanu wa wayegrechri gi rumata kluneru kamruta wa rut-srukate. Seyni numatanune nchinatkagi, gi rixanu ptowrukakapirana nyijnakotanru Nuru yegi, numatkakgi. <sup>16</sup> Gi wa gixa tsomitno Gita, seyni

Gita tsomitgi gixa. Nutakgi gyinripa, kiglerkaka gkamrutinripa, ga wa gkamrutanrupa gwagog-nenatinripa, wa klunerukokta gagjityaplu Girchi ngiwakaya Wale genekangi. <sup>17</sup> Tyenwa nyokanyegitgi, gishiniikakinripa.

*Geso galipre ginkaklewleta*

<sup>18</sup> “Tyechijne gajene gayegixinipgi, gimatanru Gita gapka rayegixna ma mayegixkanuwagina gixa. <sup>19</sup> Tyechijne gajene gixkamka, tyechijne gajene galukmakna wannanune. Seyni gi rixanu gi wa tyechijne gajengi ga wa Gita tsomitgi tyechijneya, giyagni rayegixgina tyechijne gajene. <sup>20</sup> Gishinikanru wa tokanchi wa nchinyagi: Wayegrechri gi wa rutsrukate pnute tsruni. Gitpotuko kojwakinitkana, kojwakankoxgina gixa. Wa ntokanu rumretkamkana, gixanu koxa rumretanna. <sup>21</sup> Seyni wa tye pejnunanuka kamrutingina ngiwaka chinanu, gi rixanu gi rumatluna wa nyokanatjeru. <sup>22</sup> Nuna. Nunkaklewywgitna gkojwakjenepa. Nma munkanumka, gimka nunkaklewyegitanna, gimka kmukochirepna, seyni nunkakna. Giyagni xani maleshayna rushyamukochiretinrina. <sup>23</sup> Nayegixjeru Nuru koxa rayegixa. <sup>24</sup> Wane nma mixkanupa wanna yegi, satu mkamrutanutu, gimka waneyapna mukochirna. Ga wa xani Gita koxa ga wa Nuru koxa retna. Rayegixnona Gita ga Nuru koxa. <sup>25</sup> Seyni poyagkakikolupa yonchi chinyawaka Tokanchi Yokanatkaluruya wannanu: *Gike chinanu rayegixnona.*

<sup>26</sup> “Ga wa runanu Kgimnanukakleru, Wale Girchi yegi nyokanyegitangi, wa Giwekikaluru

galikakpotu, wa Girchi yegi gishpakyachri. Wa runinipa, Wale gipgujtatanno. <sup>27</sup> Wa gixa koxa gipgujtalewatanu gi rixanu nyinuwakinyakawa gimwano.

## 16

### *Geso gomkagi ginkaklewleta*

<sup>1</sup> “Tyekaka nunkakgi gma pupjetinitipa. <sup>2</sup> Ginkaklewwakapjikaka giknokikolupa. Runanu gipapko wa katukokta giylatangi kagwakanru Goyakalu chinanu kamrurewatanri. <sup>3</sup> Tyekaka kamrutingina gi rixanu gi rumatluna Girchi, gi wa Gitako. <sup>4</sup> Seyni wa tyekaka nunkakgi, wa rapokinipa walepapko gishinkapanru wa wane nchinyagi. Seyni tyekaka gi nunkakgi muchinanu, gi rixanu gixa yegi nwa. <sup>5</sup> Ga wa xani nyokanajeru yegi nyanutka, ga wa gixa gi satuna gepomgano, ‘¿Ginaka pyanu?’ <sup>6</sup> Seyni gi rixanu nunkakgi tyekakapirana gwamonnun mpachikgajita.

### *Giwekikaluru Kpashiri kamrurepirana runkakleta Geso*

<sup>7</sup> “Seyni galikaka nunkakgi gipxakikolupni nyinripa, gi rixanu wane nma yakanu Kgimnanukakleru gi ginanmaka gixa yegi. Ga wa Gita wane yinipa, Wale nyokanyegitangi. <sup>8</sup> Wa Kgimnanukakleru gininipa rushinikanutanna tyechijne gajene mukochripirana, ga wa poyagkaklewlupirana, ga wa giklukanuwlupirana. <sup>9</sup> Mukochripirana galikaka rushinikanutanna, gi rixanu gi ralixnona Gita. <sup>10</sup> Wa poyagkaklewlupirana

rushinikanutanna, gi rixanu Girchi yegi nyanu. Gi wa getanutkano. <sup>11</sup> Ga wa giklukanuwlpirana rushinikanutanna, gi rixanu tyechijne gitsrukate giklukanuwnayegjixkalurupa.

*Galikaka potu Giwekikalurupirana runkakleta*

*Geso*

<sup>12</sup> “Gi gepika waneyawano nunkakyapgi, seyini xani gi gimkata kashnantakletlu. <sup>13</sup> Wa runinipa galikaka potu Giwekikaluru Wale kosekangi pejnuruko Galikakpotunanu Tokanchi yegi. Gi rixanu gi Waleko rushinikanu runkakletanu, seyini wa yijnakotyalu pejnananuka runkakletanu. Runkakangi ginachrikakapapirana. <sup>14</sup> Wale chinanu numalwutikolupa, gi rixanu Gitanu rawanu. Walepirana runkakangi. <sup>15</sup> Klunerukta Girchinu walekoxni Gitanu. Giyagni wane nchina wa Gitanu rawini, runkakangi.

*Gwamonnu gimuwlu gixkalurupni, china Geso*

<sup>16</sup> “Pshinitsonu gi getanutkano. Wanepnute pshinitsonu, getanutnakno.” <sup>17</sup> Giyagni wane chinkakna pimrine yimaklene,

“¿Klunerni wa tye wa wane chinyawu, ‘Pshinitsonu gi getanutkano. Wanepnute pshinitsonu getanutnakno.’ Ga wa ‘gi rixanu Girchi yegi nyanutka?’ ”

<sup>18</sup> Giyagni wane chinna, “¿Klunerni china, wa ‘pshinitsonu?’ Gi wumata jemlu wa wane chinre.”

<sup>19</sup> Rumata Geso raluka gepomgaletyaluna. Wane chinna, “¿Gixkakluko gepomgakaka wane nchininri, ‘Pshinitsonu gi getanutkano. Wanepnute pshinitsonu, getanutnakno?’ ”

<sup>20</sup> Galikakni, galikakni wane nchingi, wa gixapa chiyaganu, ga wa gwamonuwatanu. Tyechijne gajene gimuwatanu. Gixa gwamonuwatanu, seyini gwamonnu gimuwlu gixkalurupni. <sup>21</sup> Wa suxo tushpakawugenetini, kachinolu teta gi rixanu rapokatka topapko. Wa rushpakinitka mturu gi wa tushinikatkalu tsalewninrinanu, tumuwle chinanu wa tyechijne rushpakinriyatka satu yineru. <sup>22</sup> Giyagni xani gixa koxa galikakni kachinolu geta. Seyini netanutnakgi ga wa gimuwgajitanu. Gikeko koningi gimuwle. <sup>23</sup> Walegognepa gike gagjitanno gixa. Galikakni, galikakni wane nchingi, klunelukta gagjitanru Girchi ngiwakaya Wale genekangi. <sup>24</sup> Xanigognenanu gike gagjitawa ngiwakaya. Gagjitanru ga wa gyoptotanru tseruwninripa gimuwle.

*“Girchi yegi nyanutka,” china Geso*

<sup>25</sup> “Tyekaka yapkaklu tokanchiya nunkakgi. Wa gipapko ginanu, gi wa yapkaklu tokanchiya nunkakangi. Seyini pgujetanwaka nunkakangi Girchipirana. <sup>26</sup> Walegogne gixa gagjitanu ngiwakaya. Gi wane nchingi Gita gagjitanru Girchi gixa chinanupa. <sup>27</sup> Gi rixanu Girchiko galukgi gi rixanu gixa galukno, ga wa galixno Goyakalu yegi nuyaktya. <sup>28</sup> Girchi yegi nushpakamtya. Tyechijne nuna. Nuknokamtanutnaklu tyechijne. Girchi yegi nyanutka.”

*“Gita gaalixaplu tye psolchijneko,” china Geso*

<sup>29</sup> Wane chinruna yimaklene, “Petanu. Xani pgujetanuwaka pchina yanumsaleta. Gi satuna

yapkaklu pchina. <sup>30</sup> Xawakni wumata Pixa gimatlu ptowrunanuka. Gi pmaga gepomgakota. Tye chinanu walixa Goyakalu yegi puyakatya.”

<sup>31</sup> Rugitna Geso, “¿Xawakni galixge? <sup>32</sup> Gipapko ginanu, runatka, gitspalkakanu. Satkaka rawyawaka yanu. Gitapje giknokamtanu. Seyni gi Gitapjeni, gi rixanu Gitaymalu Girchi.

<sup>33</sup> “Tyekaka nunkakgi waneygi nchin- inripa giglewanshinikanru Gita chinanu. Tyechijne waneyapgi salewakchi. Seyni kiglenshinikanupgi. Gita gaalixaplu tye psolchijneko.”

## 17

### *Geso gagjigognere*

<sup>1</sup> Tyekaka wane china Geso. Teno yigata. Wane china, “Nuru, nopapko gapokatka. Puturu gimalwutikolupa Pixa chinanu, wa Pixa koxa gimalwutikolupa Puturu chinanu. <sup>2</sup> Wane pixa gitakletno pejnurune yine chinanu, wa pejnuruneko penekyano, Gita genekyapna ruwekinrina gike rixiniko mnikawnakatupa. <sup>3</sup> Tyenwa giweklu gike rixiniko mnikawnakatu, wa rumatyapyina, satupjeru Goyakalu galikakpotunanu, ga wa Geso Kristo wa pyokanatanruno. <sup>4</sup> Gita chinanu pumalwutikolutka tyechijneya. Nnikatatkalu kamrurchi penekyano nkamrutyaplu. <sup>5</sup> Ga wa xani, Nuru, penekanno noyaknu, wa Pixastsi nwini noyaknunanu tye psolchijneko mawanatkanuwa.

### *Geso gagjigogneyegitna yimaklene*

<sup>6</sup> “Wa nyi yine tyechijne gajene penekyano, nekakgiwakatyi. Pixanune, ga wa Gita

penekatka. Rumretatokanutyina. <sup>7</sup> Xawakni rumatatkaluna pejnurkakako penekyano Pixa ruyakatya. <sup>8</sup> Gi rixanu wa tokanchi wa penekyano, nenekatkana. Yoptotatkaluna. Rumatatkaluna galikakpotunanu Pixa yegi nuyakatinri. Ga wa ralixna Pixa yokanatyano. <sup>9</sup> Wanna chinanu nagjita. Gi wa tye psolchijne gajeneko chinanu nagjita, seyini penekyano chinanu, gi rixanu Pixanunni. <sup>10</sup> Wa pejnuruko wane nixle, Pixa wane gixleni. Pixa wane gixle Gitankoxni. Gimalwutkalurno waleya. <sup>11</sup> Gi wa tyechijnetkano, ga wa wanna tyechijne gwawa. Pixa yegi nyanu Gita. Nuru kpashiri, pgiwakaya pumretanna wa penekyano, satupjerune rixinripna, Wixa pixka. <sup>12</sup> Wanna yegi nwanatini, Gita gimretanatna pgiwakaya. Wa penekyano numretanatna. Gi satuna gamgiyna wanna, seyini kamchi jiglokanrunapjeni gamgana, poyagakikolupa wa yonatkaluru.

<sup>13</sup> “Ga wa xani Pixa yegi nya, ga wa tye wane nchina tyechijneya, waneyna rixinripna numuwle tseruwnapotutachri. <sup>14</sup> Gita genekna ptokanu, ga wa tyechijne gajene gayegixna, gi rixanu gi wa tyechijne gajenni, Gitako pixka, gi wa tyechijne gajerno. <sup>15</sup> Gi wa nagjita wa Pixa gwapyapna tyechijneya, seyini Pixa girukotyapna mugletuya. <sup>16</sup> Gi wa tyechijne gajenni, Gita pixka; gi wa tyechijne gajerno. <sup>17</sup> Kpashirine pixkakanna galikaka potu ptokanuya. Galikakpotni ptokanu. <sup>18</sup> Wa tye psolchijneko Pixa yokanatno, waneko pixka nixa tye psolchijneko yokanretna. <sup>19</sup> Wanna

chinanu Gitnanuko kpashiri nixnawa, kpashirine rixinrikoxapna wanna galikaka potu tokanchiya.

*Geso gagjigogneyegitna gapatachinepa*

<sup>20</sup> “Gi wannapje chinanu nagjita, seyni koxa wa nalixjenepa wanna tokanu chinanu.

<sup>21</sup> Satupjerune rixinripna pejnuruneko, Pixa pixka, Nuru, Gita pwinri, ga wa Gita Pixa nwinri; wanna koxa satupjerunepa Wixa rawinripna, wa tyechijne gajene galixinripa Pixa yokanatyano. <sup>22</sup> Wa noyaknu penekyano, wale nenekatkana. Wa satupjerune rixinripna, Wixa pixka satupjerunwu. <sup>23</sup> Wanna nwinri Gita ga wa Pixa Gita pwinri, satupjerune rixpotutinripna, wa tye psolchijneko gajene gimatinripa Pixa yokanatyano, ga wa pushinikyana Gita pushinikiniko pixka.

<sup>24</sup> “Nuru, wa wanna penekyano naluklu ginakaktanwa Gita, wanna koxa Gita yegi gwanu, wa retyapluna noyaknu penekyano. Gi rixanu Pixa gishinikno tyechijne ma mutaakanuwa.

<sup>25</sup> “Nuru poyagkakachri, tyechijne gajene gi gimaty, seyni Gita gimaty. Ga wa nyi gimata wa Pixa yokanatyano. <sup>26</sup> Gita gimatkakna pgiwaka, ga wa numatkakanna, wa gishiniklewlu wa pushinikyano wanna rawinripa, ga wa wanna nwinripa.”

## 18

*Geso samyookaluru ga wa kashichkaluru*

<sup>1</sup> Wane chininitka Geso, yatka yimakleneyma. Setro Gapga wakanute yatka, wa sana gwiywaka. Geso jiglokamtlu sana yimakleneyma.

<sup>2</sup> Ga wa Gota koxa wa samyokjerupa rumatlu sana. Gi rixanu gixo kata wane rapatjetyana Geso ga wa yimakleneyma. <sup>3</sup> Giyagni Gota ganikna solalone, wa tsrukakalune sasertotene ga wa Gwariseyonetowrerune. Wane yana yochpi-ikaluroyma, kataluyma, giylalewapiyma.

<sup>4</sup> Giyagni Geso gimatlu ptowrunanuka wa ruknogjerupa. Potukle ya. Wane chinna, “¿Katu gijga?”

<sup>5</sup> Rugitluna, “Geso, Nasare gajeru.”

Wane chinna Wale, “Gitni.”

Wannaymakoxlu Gota samyokjeru. <sup>6</sup> “Gitni,” chinanna Geso, ruxririkamtanna. Nakgamtanna.

<sup>7</sup> Giyagni rumepe gepomgaletatnakna, “¿Katu gijga?”

Wanna wane china, “Geso Nasare gajeru.”

<sup>8</sup> Rugita Geso, “Nunkakatkgi Gitni. Giyagni Gita gijgini getasha yaletanna nyi,” <sup>9</sup> poyagkakikolupa tokanchi Wale chinyawaka, “Wa penekyano, gi satuna gamgiyno.”

<sup>10</sup> Giyagni Simo Petro kyoglolewapreru, koshpaklu. Rustaklu sasertotene gitsrukate potu wayegreru, ga wa rustakjepitlu. Potuklejepi rustakyalu. Wayegrechri giwaka Malko.

<sup>11</sup> Giyagni Geso wane chinru, “Petro, gipata pyoshmakanru yoglolewapi. Wa Girchi genekyano wa girapistono, ¿gi ge nurinro?” Wane china salewnalepapirana.

*Geso Ganasa yegi*

<sup>12</sup> Giyagni solalone, ga wa ksolaloteru, ga wa Goteyonetowrerune, wanna kashichlu Geso. Rosutluna. <sup>13</sup> Ganasa yegi gapka ranikluna. Gi rixanu Kaygwasu gimatjirni. Walenwa wale walapu sasertotene gitsrukaptopu. <sup>14</sup> Walenwa Kaygwasu wa Goteyone giykotachri, wa wane chinachri wa rupxakyapna wa satu jeji gipninripa yine chinanu.

### *Sasertotene gitsrukaptopuji rawini Petro*

<sup>15</sup> Simo Petro gomkagitlu Geso, ga wa satu yimakleru. Wa tye yimakleru rumata sasertotene gitsrukaptopu. Gesoyma jigloklu sasertotene gitsrukaptopuji. <sup>16</sup> Maleka, gipgyaptostsi rawanata Petro. Giyagni rushpaka wa satu yimakleru wa sasertotene gitsrukate potu gimatanru. Ruynum-satlo gipgyapto gajero. Gitoko raniklu Petro.

<sup>17</sup> Giyagni wa gipxaklewatachro gipgyapto gajero wane chinru Petro, “¿Gi ge tye jeji yimaklerkoxyi pixa?”

Wale wane china, “Gi wa gitni.”

<sup>18</sup> Wane tunwanatna wayegrechine ga wa towrechine, yoshikpawatachine. Gi rixanu kachikleru. Rolkana. Petro koxa wannastsi tunwata. Rolka koxa wale.

### *Sasertotene gitsrukate potu gepomgalu Geso*

<sup>19</sup> Giyagni wa sasertotene gitsrukate potu gepomgalu Geso, yimaklenepiranaya, ga wa runkaklewleya. <sup>20</sup> Geso gigitlu, “Pgujetanuwaka potu nchina yanumsayegletna psolchijneko gajene. Gita ginkaklewjeta ginkaklewwakapiya, wa rapatjejetyawakna pejnuruneko Goteyone. Gi wa yogimawakako nunkaklewatya.

21 ¿Klu pepomgiyno Gita? Pepomganna wa yijnakotachine wa nchinyawakna. Petanu. Wanna gimata wa nchinyawaka.”

22 Wa wane chininitka, satu towrechri wane tunwanatachri giptagojitlu Geso. Wane china, “¿Wane pixa gigletlu sasertotene gitsrukate potu?”

23 Rugitlu Geso, “Wa gektutu nyanumsatini, pupgujanru gektutu, ga wa kigleru, ¿klu chinanu puylakno?”

24 Giyagni sasertotene gitsrukate potu Kaygwasu yegi yokanatlu Ganasu gostutkaluru.

### *Petro nutatlu Geso*

25 Wa Simo Petro tunwa golkalenatachri. Wane chinruna, “¿Gi ge satu yimaklerkoxyi pixa?”

Wale nutata. Wane china, “Gi wa gitni.”

26 Satu sasertotene gitsrukate potu wayegreru, wa Petro gistakjepmoletanru, wane chinru, “¿Gi ge sana netyayi Waleyma?”

27 Giyagni rumepe nutletatnaklu Petro. Waneklu yanumatatka gaxawripa.

### *Geso Pilato yegi*

28 Giyagni Kaygwasu yegi ranikyatkaluna Geso. Tsrupji, Pretoryopji ranikluna. Goyechnokawni. Wannako gi jigloklu Pretoryopji ma puchowninripna, seyini wa Tsru Giknoglushgogne nachnewlu nikinripna. 29 Giyagni maleka rushpakye-gitna Pilato. Wane china, “¿Klu gijigyegitlu tye jeji?”

30 Rugitluna. Wane chinruna, “Gektutu ma kamrutkanumka wa Tye, gimka wsamyokanyi.”

<sup>31</sup> Giyagni Pilato wane chinna, “Ganikanru gixa. Giklukanuwnayegjixanru Tokanchi Yokanatkaluru gixanu chinyawaka.”

Wane chinruna Goteyone, “Ginanshichkaluru wuylatyaplu satu.” <sup>32</sup> Wane rixa wa poyagakakikolupa Geso wane chinre, wa rumatkakyana gi pixkalutu gipukchi rupninripa.

### *Pilato gepomgalu Geso*

<sup>33</sup> Giyagni Pilato rumepe jiglokletlu Pretoryopji. Tomsatlu Geso. Wane chinru, “¿Pixni Goteyone Pogiryi?”

<sup>34</sup> Rugita Geso, “¿Pixako pushinikanrerge wane pchina, waka pimrinra ginkakyi wa Gitaya?”

<sup>35</sup> Rugita Pilato, “¿Gitlege wa Goteyo? Pumolene ga wa tsrukakalune sasertotene gita samyokyina. ¿Kluneru pkamruta?”

<sup>36</sup> Rugita Geso, “Wa npogirewatyawaka gi wa tyechijne rawa. Tyechijne rawkamka npogirewatyawaka, ntowrerune yagotkakanmaka nma samyokikotupmaka Goteyone yegi. Ga wa xani npogirewatyawaka gi wa gewi rawa.”

<sup>37</sup> Giyagni wane chinru Pilato, “Giyagni ¿pogirchiklayge Pixa?”

Rugita Geso, “Pixa wane chinyawaka pogirchi nixinri. Wale chinanukni nushpaka, ga wa wale chinanukni nuna tyechijne, nupguytatyaplu tokanchi galikakpotunanu. Pejnuruko galikakpotunanu gixachri yijnaktokanutno.”

<sup>38</sup> Pilato wane chinru, “¿Klunerni wa galikakpotunanu?”

### *Waka Geso waka Warawasu*

Wa wane chininitka rushpakatnaka Goteyone yegi. Wane chinna, “Gi satuna nukshikyalu ruklukanuwninri. <sup>39</sup> Wa gixa gixjetyawaka satu nkoshpakyegityagi tsru Giknoglushgogne. ¿Giyagni gi ge galuklu gita koshpakyegityapgi Goteyone Pogire?”

<sup>40</sup> Giyagni pejnuruneko gimepe saplewletatnaka. Wane chinna, “Gi wa Tyepni, seyni Warawasni galikakapni.” Ga wa Warawasni kachowgurni.

## 19

### *Getanru wa jeji*

<sup>1</sup> Giyagni Pilato gwapatkalu Geso. Kochipjexixlu. <sup>2</sup> Solalone kona kamgiylona sagyeta. Yoshmakjiwutluna. Pakniga yoshmookaluru pixkalutu mkachri yoshmakluna. <sup>3</sup> Wane chinna, “¡Galú, Goteyone Pogire!”

Ruylakluna.

<sup>4</sup> Pilato gishpakatnaka maleka. Wane chinna, “Getanu. Nanikyegitgi maleka, wa gimatinripa gi satuna ruklukanuwninri nukshikyalu.”

<sup>5</sup> Giyagni rushpaka Geso maleka. Sagyeta kona kamgikolo rutaka, ga wa pakniga yoshmookaluru pixkalutu mkachri. Wane chinna Pilato, “Getanru wa jeji.”

<sup>6</sup> Giyagni retinitkaluna tsrukakalune sasertotene ga wa towrechine, saplewatna. Wane chinna, “¡Koroshishkita putakaganru! ¡Koroshishkita putakaganru!”

Pilato wane chinna, “Gixako ganikanutkalu. Koroshishkita gitakanru. Gi rixanu gita gi gikshikyalu wa ruklukanuwninri.”

<sup>7</sup> Rugitluna Goteyone, “Wixa waneya Tokanchi Yokanatkaluru. Tokanchi Yokanatkaluru wixanu chinyawaka rumkata gipnaleta, gi rixanu Goyakalu Wgene rixnawa.”

<sup>8</sup> Tye tokanchi jeminitka Pilato, pnute pikletkalu. <sup>9</sup> Rumepe jiglokletatnaklu Pretoryopji. Wane chinru Geso, “¿Ginaka giyakatyachriyi?”

Seyni Geso gi gigitlu. <sup>10</sup> Giyagni wane chinru Pilato, “¿Gita gi wa puynumsata? ¿Gi ge pumata wa gita gitaaka koroshishkita nutakyapyi, ga wa nutaaka nkoshpakyapyi?”

<sup>11</sup> Rugita Geso, “Tengogne pma mutaakikamka gimka putaako Gita chinanu. Giyagni pixa yegi nsamyokjeru pixa pnute tsru mukochri waneylu wale.”

*Pilato samyoklu Geso koroshishkita rutakikolupa*

<sup>12</sup> Wanekluyakawa Pilato galukmaka koshpakletlu. Seyni Goteyone saplewata. Wane chinna, “Wa Tye pkoshpakinipa, gi wa Susa gimatjerpakayi. Girukokta pogirchi rixnawa yoptopiratlu Susa.”

<sup>13</sup> Giyagni Pilato tye tokanchi yijnakotinri, maleka ranikatkalu Geso. Gitakyagoklewjetikwaka tuplata, wa Sotlumta chinikwaka, ga wa Gewreyone tokanu, Kawata. <sup>14</sup> Tsru Giknoglushgognestsitkani. Tumananutkani. Wale wane chinna Goteyone, “Getanru Mpogire.”

<sup>15</sup> Giyagni wanna saplewata, “¡Puxriikakanru! ¡Puxriikakanru! ¡Koroshishkita putakaganru!”

Wane chinna Pilato, “¿Wa koroshishkita nuktanru mpogire?”

Rugitluna tsrukakalune sasertotene, “Maleshaywu wpogire. Susapjeni.”

<sup>16</sup> Giyagni samyoklu koroshishkita rutakyapluna. Yoptotluna Geso. Ranikatkaluna.

### *Koroshishkita gitaakaluru*

<sup>17</sup> Rutjitarokoroshiteshkitatkatka. Ralimta. Jiwchiswaga yegi chinikowaka ya. Gewreyone tokanu wane chinka Kolkota. <sup>18</sup> Wane koroshishkita rutakyaluna, ga wa Waleyma pimrine gepi. Satkaka pasretkaka. Geso ganikaji gwa.

<sup>19</sup> Yonatkoxlu Pilato jigyegitikalupirana. Koroshishkitaptostsi rutaklu. Wane chinyongata:  
*Geso, Nasare Gajeru, Goteyone Pogire.*

<sup>20</sup> Giyagni gixo Goteyone getyongatlu tye jigyegitikolu, gi rixanu koroshishkita rutakikwaka Geso, gi gowuklu tsru pokchi. Gewreyone tokanu yonatika, ga wa Ratinane tokanu, ga wa Kriykone tokanu. <sup>21</sup> Giyagni tsrukakalune sasertotene Goteyonenu wane chinru Pilato, “Gi wa ‘Goteyone pogire’ pchinkakyonganru, seyni, ‘Wale wane china, “Goteyone Pogirno” ’ ”

<sup>22</sup> Rugita Pilato, “Nyonatanrutkani nyonatatka.”

<sup>23</sup> Giyagni solalone koroshishkita gitakinitkalu Geso, rawamkatatkaluna. Gepkoxamkoje kotspaltatyatkaluna, satkaka solalonenupa. Ga wa gimkaluchrata. Wa gimkaluchrata myotsgakotni. Teno ruyaka saxpaletika psoluko.

<sup>24</sup> Giyagni wannakakluko wane chinkaka, “Gi wa

wsuskakanru, seyni wupenokatanru galikaka katunpaktani wa mkachri.”

Wane rixa poyagakikolupa wa yonchi wane chinachri:

*Kotspalatluna nomkalu wannanupa rixinripa.*

*Nomkalu chrata rupenokotna.*

Giyagni wane rixna solalone.

### *Geso gitaklo runro Gwa yegi girukotyaplo*

<sup>25</sup> Geso koroshishkitatesti koxa tunwanatna runro, ga wa runro gepuro, ga wa Mariya wa Kleyogwa gnumro, ga wa Mariya Maktala gajero.

<sup>26</sup> Giyagni Geso getinna runro ga wa yimakleru rushinikanru wane gwanatachri, wane chinro runro, “Suxo petanru puturu.”

<sup>27</sup> Wanepnute wane chinru yimakleru, “Petanro punro.” Wanekluyakawa yimakleru ganiklo waleyma tixinripa.

### *Geso gipnale*

<sup>28</sup> Wanepnute gi rixanu rumata Geso pejnurkakako poyagkaakalurutkani wa yonchiko poyagakikolupa, wane china, “Nonunnagatewata.”

<sup>29</sup> Wanenanro pastono kachgalu gwanro katsepolo. Giyagni wanna shichpongakaklu katsopi kachgalu. Gisopoje rutakluna. Ginama rapookakluna. <sup>30</sup> Giyagni kachgalu rurinitka Geso, wane china, “Nikatkalurutkani.”

Yonogiwumta. Reneklu ruwekinri.

### *Yoglokwanapatka Geso*

<sup>31</sup> Tsrus Giknoglushgognestsitkani, ga wa tsrupotgoggenwa wale gapnanutikalurgogne. Giyagni koroshishkita ma mutukmanetinitipna

gapnanutikalurgogne, Pilato ragjitna Goteyone jiknagatpalitikolupna, wa koroshishkita koshpakikolpatkana. <sup>32</sup> Giyagni solalone wane ya. Yoptowaka gwachrigapkani jiknagatpalitna. Waneko pixka rixanruna wa satni wa Waleyma koroshishkita gitaakalurni. <sup>33</sup> Seyni wa Gesni yegi rapokinna gi rixanu retluna gipnachritka, gi wa jiknagatpalitataluna. <sup>34</sup> Seyni satu solalo yoglokwanapatlu chokorujeya. Waneklu rushpaka gigraga, gonu koxa. <sup>35</sup> Wa getachri gipgujtatlu, ga wa rupgujtale galikaka potu. Wale gimata wa galikaka potu china, wa gixa koxa galixinripa. <sup>36</sup> Gi rixanu tyekaka wane gixka poyagkakikolupa wa yonchi chinikwaka: *Gi jiknagaputko Wale.* <sup>37</sup> Ga wa satu yonchi koxa wane chinatnaka: *Retanruna yoglotanruna.*

### *Kapnatkaluru Gesni*

<sup>38</sup> Wanepnute Gosi Garimate gajeru, Geso yimaklerni seyni giyogimatnachriwa Goteyone pikle chinanu. Pilato ragjita wa Gesnimane koshpakinripa. Ruchichlu Pilato. Giyagni wane ya. Koshpakmanetlu Geso. <sup>39</sup> Nikotemo koxa wane ya, wa muchikawa goyecho no yayegitjeru Geso. Raniklo miramunga ga wa galowemunga yapjetkaluro, gepkoxamkojmole patsrujire getko ginnu. <sup>40</sup> Ranikmanetatkaluna Gesni. Poyitataluna mkachrichrata. Pgamlugalo rupoyitluna wa Goteyone gixjetyawaka kapnatikolupa. <sup>41</sup> Wa koroshishkita rutakikwaka waneru sana. Wa sana waneru gerotu yomlechi, satuna ma mutakikowakanuwa. <sup>42</sup> Giyagni gi rixanu Tsuru Giknoglushgognestsitkani

Goteyonenu, ga wa gi gowuklu yomlechi, wane rutakluna Gesni.

## 20

### *Yotunru*

<sup>1</sup> Muchinangogne wa simana, goyechnokawpoto tuko mapshagakowalu yomlechi tya Mariya Maktala gajero. Tetlu sotlu gajriikaluru yomlechiya.

<sup>2</sup> Giyagni tasukamta. Simo Petro yegi tya, ga wa satu yimakleru Geso galukanru. Wane chinna, “Kapna ranikyatkaluna Gitsrukaachini. Gi wumata ginaka rutakanruna.”

<sup>3</sup> Ralimta Petro ga wa satu yimakleru. Yomlechi yegi yana. <sup>4</sup> Pagasukamtkalunni gepi. Wa satu yimakleru kapnugamtlu Petro. Wale gapka gapoklu yomlechi. <sup>5</sup> Rujnoka getletlu. Retlu mkachrichrata wane gwanatachri. Seyni gi wa jigloka. <sup>6</sup> Giyagni rapoka romkagitjeru, Simo Petro. Jiglokamtlu kapna. Retlu mkachrichrata wane gwanatachri. <sup>7</sup> Ga wa kasamalu wa gijiwu sapwakanatachri gi wa mkachrichratayma rawanata, seyni sapruruukaluru pasretako gitaakaluru. <sup>8</sup> Giyagni jiglookoxatka satu yimakleru wa yomlechi gapokgapkatachri. Retlu. Ralixa. <sup>9</sup> Giyagni gi rumatawaluna yonchi chinyawaka, wa rumkata yotunretinripa gipnachinetskalaya.

<sup>10</sup> Giyagni satokatnakna yimaklene gimolenyegna.

### *Geso gipgujewnayegitlo Mariya Maktala gajero*

<sup>11</sup> Wa Mariya maleka tunwanata. Yomlechistsi chiyaganatya. Wa chiyaganatini tujnoka tetyaplu kapna. <sup>12</sup> Tetna gepi Goyakalutowrene

klatamkalune tuplanatachine, satu gijiwusretananu, ga wa satu gijixisretananu Gesomane gwanatyawaka. <sup>13</sup> Wane chinrona, “Suxo, ¿klu kachokyi?”

Wane chinna wala, “Gi rixanu ranikluna Nut-srukatni. Gi numata ginakakta rutakanruna.”

<sup>14</sup> Wane chininitka tuprotaka. Tetlu Geso. Wane rawanata. Gi tumatlu wa Geso rixinri.

<sup>15</sup> Wane chinro Geso, “¿Suxo, klu kachokanaty? ¿Katu pujga?”

Wala kagwaklu sana girukotachrini. Wane chinru, “Gitsrukaachi, Pixa ganikiniplu punkakanno ginaka putakniri. Gita ganikanutkalu.”

<sup>16</sup> Wane chinro Geso, “¡Mariya!”

Tuprotaka. Wane chinru wala, “*¡Rawoni!*” Wane chinreni, “Yimaklewatachri.” <sup>17</sup> Wane chinro Geso, “Gi pkamrukanno, gi rixanu gi wa teno nyawa Gita, Nuru yegi. Seyni nomolene yegi pyanu. Punkakanna, “Teno nyanu Nuru yegi ga wa Giru yegi, Noyakalute yegi, wa Goyakalute yegi.’ ”

<sup>18</sup> Talimta Mariya Maktala gajero. Tunkakna yimaklene wa tetyawakatkalu Gitsrukaachi, ga wa tyepirana wane chinro.

### *Geso gipgujewnayegitna yimaklene*

<sup>19</sup> Wa muchinangogne simana kaynotka, tushyatka gipgyaptokaka wa yimaklene gapatyawaka Goteyone pikle chinanna, runa Geso. Wanna ganikajite tunwata. Wane chinna, “Kiglenshinikanupgi.” <sup>20</sup> Wane chininitka

rekakgimyotna ga wa gikwanapa. Giyagni yimaklene gimuwata retyawakluna Gitsrukaachi.

<sup>21</sup> Giyagni rumepe wane chinretatnakna Geso, “Kiglenshinikanupgi. Wa Girchi yokanatiniko pixkano Gita, waneko pixka nixa yokanretgi.”

<sup>22</sup> Wane chininitka, runnipgyayegitna. Wane chinna, “Gyoptotanru Giwekikaluru Kpashiri.

<sup>23</sup> Wa gixa kaspukmukochiretanune, kaspukyegitkalunepni. Wa gimretmukochiretanune gimretyegitkalunepni.”

### *Tomasu malixle*

<sup>24</sup> Wa Tomasu, satu wa pamole gepi rixinrina, wa Gepirutu chinkaluru, gi wannayma wane rawanata wa Geso gapkapini. Giyagni wane chinruna pimrine yimaklene, “Gitsrukaachi wetatka.”

<sup>25</sup> Wane chinna wale, “Nma metkanuplu wa gimyo wa klawopchole, nma yoshmaakanuplu nomyoji klawopna, nma yoshmaakanuplu nomyo gikwanapa, gi nalixanu.”

### *¡Nutsrukate! ¡Noyakalute!*

<sup>26</sup> Yokgipgogne giknoginitka, gitoko rawanatanakna yimaklene. Wannaymakoxlu Tomasu. Runa Geso. Gipgyaptokaka gishyatka. Ganikaji tunwata. Wane china, “Kiglenshinikanupgi.”

<sup>27</sup> Wane chinatkalu Tomasu, “Pomyokyegitanno pumyoji. Petamyotanno. Pomyokyegitanno. Nokwanapa pyoshmakanru. Gi wa malixakletupyi, seyni galixachripyi.”

<sup>28</sup> Wa Tomasu gigitlu. Wane chinru, “¡Nutsrukate! ¡Noyakalute!”

29 Wane chinru Geso, “Gi rixanu petno, palixa. Giglenshinikanutkalunni nmametjene ga wa galixachine.”

*Twu kiruka rumushinikikolupa*

30 Giyagni gi gepi pimrikaka getkalurkaka kamruta Geso, yimaklene getanu, twu kiruka mutakyongatkotu. 31 Tyekakni yonatkaluru galixinripa Gesonwa Kristo Goyakalu Wgene, ga wa galixinri waneyaggi giwekinri giwakaya.

## 21

*Geso gipgujewnayegitna payokgipre yimaklene*

1 Wanepnute Tiwerya Wenne rupgujewnayegitnatnakna yimaklene Geso. Wane rixa gipgujewnaleta. 2 Rapatanatna Simo Petro, ga wa Tomasu wa Gepirutu chinkaluru, ga wa Natanayli, Kana gajeru Kalilesreta, ga wa Sewereyo wgenene, ga wa pimrine gepi yimaklene. 3 Wane china Simo Petro, “Nchaluntapanu.”

Wane chinruna, “Gapakapwu pixayma.”

Wane yana. Kanawa ruptekna. Wale yecho, gi satona kashichna.

*Tiwerya Wennestsi rupgujewninri Geso*

4 Goyechnokawa chininitka, wanga tunwanata Geso. Seyni wa yimaklene gi rumatluna Geso rixinri. 5 Wane chinna, “Wiwine, ¿gi ge waneygi gnikanrupa?”

Rugitluna, “Malesha.”

6 Wale wane chinna, “Kanawa potuklesretate giknokanru chalu. Gikshikanro.” Giyagni ruknokluna. Gi rumkata kosletatkaluna, gi rixanu gi gepiklo shima.

<sup>7</sup> Giyagni wa yimakleru Geso gishinikanru wane chinru Petro, “Gitsrukaachikni Wale.”

Giyagni wa Simo Petro wa yijnakotinitka Gitsrukaachi rixinri, gimkalu sapwaknawa gi rixanu mamkatunanni. Tsru wenu ruptekgamtatka. <sup>8</sup> Ga wa pimrine yimaklene kanawa yapamta, gi rixanu gi gowuklu chiji, seyni pamyomolestsi getko gowuknuni. Kosemtluna chalu shimayma.

<sup>9</sup> Giyagni chiji ruptekinitkana, retluna chichpawa giplepokotkaluru, ga wa shima gitaakaluro, ga wa jimapro. <sup>10</sup> Wane chinna Geso, “Ganikanro shima, wa gkashichanronatka xani.”

<sup>11</sup> Ratskotlota Simo Petro. Chiji kosemtlu chalu. Katsepomnuro tsrokaka shima. Satu pacha pamyomole mapa shima. Wane pejnumkalo, seyni gi ruskaka chalu. <sup>12</sup> Wane chinna Geso, “Ginanutka. Gnikanutka.”

Gi satuna yimakleru tserpiranawata wa repomgiyaplu, “¿Katyí Pixa?” Rumatluna wa Gitsrukaachi rixinri. <sup>13</sup> Runa Geso. Koscheklu jimapro. Renekna. Waneko pixka rixlo shima. <sup>14</sup> Tyenwa mapa kata chininri rupgujewna Geso yimaklene yegi wa gipnachinetskalaya rali yotunretinitka.

### *Peneka nikletanna nowegatene*

<sup>15</sup> Giyagni rali nikaprikletinitkana Geso wane chinru Simo Petro, “Simo Gonasu wgene, ¿gi ge pushinikno wa nyi pnute?”

Wane chinru, “Gigi, Gitsrukaachi. Pixa gimata nalukyayi.”

Wane chinru, “Peneka nikletanna noprane gowega wgenene.”

<sup>16</sup> Rumepe wane chinretatnaklu, “Simo, Gonasu wgene, ¿gi ge pushinikno?”

Wane chinru, “Gigi, Gitsrukaachi. Pixa gimata nalukyayi.”

Wane china, “Peneka nikletanna nowegatene.”

<sup>17</sup> Mapa kata chininri wane chinru, “Simo, Gonasu wgene, ¿Gi ge palukno?”

Wamontaklu Petro wa mapa kata chininri wane chinru, “¿Gi ge palukno?”

Wane chinru, “Gitsrukaachi, Psoluko pumata. Pixa gimata nalukyayi.”

Wane chinru Geso, “Peneka nikletanna nowegatene. <sup>18</sup> Galikakni, galikakni wane nchinyi wa makluji pixini pushrikapchijitnawa. Palukyawaka pya. Wa tsrutsoleji pixini pkanrakanu. Satu gishrikapchijitanyi. Ranikanyi pma maluka yaletyawakanu.” <sup>19</sup> Tyenwa china rumatkakyaplu gi pixkalutu gipukchi chinanu rumalwutikolupa Goyakalu. Wane chininitka wane chinru, “Pomkagitanno.”

### *Yimakleru rushinikanru*

<sup>20</sup> Ruprotaka Petro. Retlu wa yimakleru wa Geso gishinikanru romkagitjerna, wa rutspanostatkoxjeru nikiwakaya, wa wane chinachri, “Gitsrukaachi, ¿katupni wa psamyokjerupa?” <sup>21</sup> Giyagni Petro getlu wale. Wane chinru Geso, “Gitsrukaachi, ¿ga wa tye, gi rixanu?”

<sup>22</sup> Wane chinru Geso, “Nalukiniplu rutukanu wale nuninpotunanuko, ¿gi pixanru pixa? Pomkagitanno pixa.”

<sup>23</sup> Giyagni rushpaka tye tokanchi wa moletkakashinkakluko, wa tye yimakleru gi wa

rupnanu. Seyni wa Geso gi wane chinru, “Gi rupnanu,” seyni, “Nalukiniplu rutukanu wale nuninpotunanuko, ¿gi pixanru pixa?”

<sup>24</sup> Tyenwa yimakleru gipgujtatachri tyekakapirana. Wale yonatlu tyekakapirana. Wumatlu wa rupgujtalewle galikakpotunanni.

<sup>25</sup> Gi gepiikoxlu wa Geso kamrutanru. Satkaka yonatkamka walepje rixinri, nkagwaklu gi wa tye psolchijneko poyagotlo kiruukaka yonatkalurup-maka.

## **Gerotu Tokanchi Gipiratkaluru New Testament in Yine**

copyright © 2008 Wycliffe Bible Translators, Inc.

Language: Yine

Translation by: Wycliffe Bible Translators, Inc.

Yine [pib], Peru

### **Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Yine

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

5c761e81-2e6f-5161-be9d-dbc456a2816b